

१५८

दर्ता नं.: ४८/२०७६/७७

पुर्खा दय्क तकगु सम्पत्ति, भीगु कला व संस्कृति
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

स्वयंदा

नेपाल संवत् १९४५ तछलाथ्व: / २०८२ जेठ १५ / 2025 May. / ल्या: १३२, दाँ: ७



इतिहासया गर्भय छिड: धान्यतांगु ऐतिहासिक व सांस्कृतिक
महत्त्वया लक्ष्मी नवसिंह देवा: उलेज्या

खवप इन्जिनियरिङ्ग न्हँपुं ब्वनामिपिन्ता लसकुस
(२०८२ जेठ १ गते)



पर्यटन लागाय ब्यापु दःपुं नपां बैठक
(२०८२ जेठ १२ गते)



; Dkfb sLo

@)*@ h7 !%, c^s !%*, jif&

समाजवादी आन्दोलन हळ्याय्ता भिन्तुनय्

थौ जेठया १५ गते गणतन्त्र दिवस । थौ स्वयो हिन्ह्यदा हाँ न्हि ल्या: २०६५ साल जेठ १५ गते नेपालय् गणतन्त्र नि:स्वांगु ख: । नेपालय् नेस व पीदातक शासन यागु राजतन्त्रता विधिवत रुपं हे हाँग:लिसें ल्यं थांगु दिन ख: । गणतन्त्रया घोषणा याबलय् नेप:मि पुं अपलं लयत:गु ख: । सकल नेम:मिपिसं नयगु, पुनय्गु व चवनय्गुथाय् व्यवस्था जूइगु नपां मथां हे देशं विकासया पला छिइगु म्हागस खांगु ख: । प्रतिगमन विरोधी आन्दोलन याड: च्वंपु नेपाल मजदुर किसान पार्टी, नेका, एमाले नपां न्हयगू दल व माओवादीया मंक: आन्दोलनं नेप:या इतिहासय् हे दकलय न्ह:पां संविधान सभाया चुनाव जूगु ख: । आन्दोलन याड: च्वंपु नेता, कार्यकर्तापिन्ता हे देशया अपलं थासं त्याक: छ्वयो ह:गुलिं जनतां नेतातय्के आशा, भरोसा का कां विश्वास प्वंकगु ख: ।

हिन्ह्यदाया थुगु इलय नेका, एमाले व माओवादी पालंप: त:कहे सरकारया न्ह्यलुवा जुयो शासन चलय याता । मदिकक सरकारय् वाड: ज्या याड: च्वना । अथेनं जनताया भिं ज्याखय् छक्वचाहे यागु खानय् मरु । सरकारय् वांगु दलतय्सं भ्रष्टाचार याय्गु, भ्रष्ट तय्ता ल्यंक:, पाखुयो तय्गु, देया न्ह्यागु नं लागाय् भिंपुं, फपुं स्वयो भागवण्डाय् थ:पुं कार्यकर्ता छ्वयगु ज्या जक याता । शिक्षा व स्वास्थ्य थजगु आधारभूत आवश्यकता (मदयक मगागु) या विषयलय् नपां न्याय मियगु वस्तु थें याता । गरिब जनतां सरकार द: धाय्गु मति वानिगु छुं ज्यातक याय् फ:गु मरु ।

ल्यासे ल्याम्होपुं विदेशय् ज्या म: मवांसें मगाक बिला, ब्वनामिपुं दायें लाखम्हा स्वयो अप: सिनं उच्च शिक्षा काय्ता विदेशय् वानय् हे म:गु अवस्था हयो बिला । डाक्टर, इन्जिनियर, प्राध्यापक थजपुं दक्ष जनशक्तिं देश त्व: तय् माय्क: बिला । थव फुक्क सरकारय् वापुं दलतय्सं भिंगु, गतिलागु ज्या याय मफूगुया लिचव: ख: ।

देया बजेट स्वयो यक्व, यक्व २७ खर्ब सार्वजनिक ऋण थ्यनय धुंकल, व्यापारघाटा लच्छिया छगू खर्ब स्वयो अप: द:, निर्यात योग्य वस्तु पिकाय फ:गु मरु । फुक्क कल कारखानात निजीकरणया नामय खाखचा मूलं व्यक्तितय्ता म्युं सेलिं देश आर्थिकरुपं भपुइगु पह: खानय् दयो वल ।

गणतन्त्रता जनतां असन्तोष क्यंगुया लव क:सेलिं जेठ १५ गते हे जुजुवादीपिसं राजसंस्था (जुजु) लिफ्यड: हय्गु माग तयो आन्दोलन याय्तांगु जुल । पुँजीवादी गणतन्त्रं जनताया समस्या ज्यंकय् फैमखु । थुकिया अर्थ राजतन्त्र थुकिया पलिसा मखु व जुय नं फै मखु । राजतन्त्रं जनताया समस्या ज्यंकय् फैगु जूसा नेप:देशं जुजुता लिकायो राजतन्त्र ल्यंथानि हे मखुनि । अ:या इलय राजतन्त्र माला धाय्गु प्रतिगामी पला ख: । समाज विकासया नियमया अख:गु पला ख: । समाज भन लिनय् लिनय् वानय् फै मखु ।

हलिमय पुँजीवादं जनताया समस्या ज्यंकय मफूगुलिं हे वैज्ञानिक समाजवाद वगु ख: । उत्पादनया मू मू साधनत सामाजिकीकरण जुइगु, शिक्षा व स्वास्थ्य उपचार धेबा म्वायक: नि:शुल्क जुइगु, योग्यता काथं ज्या व ज्या काथं या ज्यालाया व्यवस्था दैगु नपां व्यक्तित्व विकासय् उथिंयंक मौका दैगु समाजवादी गणतन्त्र अ नेप:देशय् महयक:मजिल । नेप:मिपुं समाजवादी गणतन्त्र ह्य्ता हज्याय फयम:, भिन्तुनय् ।

पिकाक-ख्वप नगरपालिका/सम्पादक-आशाकुमार चिकंबञ्जार, डेस्कटप-धन लक्ष्मी त्यात, आवरण सज्जा-रेणु ध्वज, थाकू- भक्तपुर अफसेट प्रिन्टर्स फोन ल्या: ०१-६६१३०४३, ई-मेल- khwopapau@gmail.com

संख्याकः जुल, छँ वानय मनि

नारायण मान विजुवछँ (हरिबहादुर श्रेष्ठ)



१९ माघ खुन्हं, लार्थे पुलिसतय्गु मोटर लिइमलाक न्ह्याकः चवना । स्वनिगःया तःतःब्यागु छगू छगू प्यट्टकां लाथाय् सशस्त्र सेना, छिरिबिरी नं फियो चवंपिसं पः बियो चवंगु दः । लॉय् व फलय् डायो जूपुं मनूत उलि खानय् मरु ।

न्हिनयसिया प्यता ई जुल । चोकया छगू च्यापसलय् च्या त्वँपुं मनूत म्वः म्व दः । गुम्हासियां मःमः, गुम्हासियां चाउमिन नयो चवंगु दःसा गुम्हासियां च्या जक त्वडः चवना । मेच फुकं जायक चवडः चवंगुलिं गुम्हां गुम्हां दाडः तं च्या त्वडः चवना । उगु हे इलय् डाम्हा-खुम्हा कलेजया मचात कलेजया ड्रेस (वस) पुडः लाहातय भोला ज्वडः द्रहँ वला । न्हपा वयो चवंपुं नेम्हा प्यम्हा धेबा पुल प्याहाँ वान । छम्हा मिसा मचां ताः हाक सास ल्हाडः धाल - 'जिं स्वय बलय् भीगु कलेजं हे, स्वीम्हाति मिजं मचात ज्वडः यंकल ज्वी । व मिसाचाय्गु घाँटी चिड तःगु ताई खय् घण्टाघरया चिं दः ।

भातिचा ख्यंगु रंगया नं फियो तःम्हा मिजंमचां थाकु चा चां धालः 'ग्व

थौं जिगु मन कक्षा क्वथाय् हे मरु, पिनय्या नारा, जुलुस, पर्चा व पुलिसया लाठी व बुटया सःजक जिगु न्हयपतय् श्वयो चवना ।'

भातिचा ग्याचिकु पहः पिकायो छम्हा तुइचा खवः म्हा मिजंमचां छुं लुमांकः स्वथें चवंकः धालः 'कन्या क्याम्पसं नं डाम्हा च्याम्हा मिसा मचात ज्वडः यंकल हाँ उगु इलय् लाक हकनं छव्वथां (ग्राहक) गहः वपुं वल, नेम्हा प्यम्हा हकनं प्याहाँ वान । न्हँपुं गह त थय्कं स्वयबलय् गुम्हां मास्टर, कर्मचारी अलय गुम्हां साधारण जनतात थें चव । व्वनामिपिसं मःमः नलासा न्हँपुं ग्राहक पिसं चाउमिन बिया धायो फ्वन ।

न्हँम्हा गह मध्ये अथे हे पीदाति दःम्हा, ख्वातुगु कापया धवला धवलागु कोट फियो तःम्हा छम्हा मास्टरं नेपां लाहा टेबुलय् चुयो थःपासापिनि दखय् स्वयोधालः थौ सुथाय् ७:०० ता इलय्या रेडियो खय् शाही घोषणाया बुखाँ न्यनय्वं हे जुजुं छुं कडागु पला तइला धाय्गु जिगु मति वांगु खः ।

मकै बुट्टाया तपुली पुयो चवम्हा छम्हा कर्मचारी धाल - ग्वः किजा, जियां ९:०० ता इलय हे अफिस वानय्ता डेरां प्याहाँ वाडा । शाही घोषणाय् छु दः उकिं छु जुई धाय्गु नं मस्या । भाति भाति भुई भुई त्वीं त्वीं जक न्यडा ।' गना ? जिमिसंयां चिच्याग्वगु ट्रान्जिस्टर छगः हाय्क अफिसय् चवडः हे शाही घोषणा न्यडा । बच्छिति न्यनय धुं मधुं बलय हे अधसा प्रजातन्त्र वानक जक

मति वान ।' वाउंगु ज्याकेट फियो चवम्हा मेम्हा मास्टरं तान ।

गम्भिर जुजुं धवला धवलागु कोट फियो चवम्हा शिक्षकं न्हयसः तलः शाही घोषणाखय् राजनैतिक पार्टीतय्ता छुं क्वत्यलय्गु व छुं भाति कुं खियगु धात्थें हे दः । अथेनं जुजुया सक्रियता व जुजुया नायो सुई दयकिगु सरकारंजक पुँजीबादया लोभ व पापया बाँमलागु ज्यात न्हँकय् फैलालय् ? धायगु मनय वाडः चवना जितायां । पञ्चायतया स्वीदा नं यां जुजु हे सक्रिय जुयो सांगु धाय्मः, ग्वलय् आर्थिक समानता, व्यक्तित्व विकासय् उथिं ग्यंक मौका व विदेशं त्यल काडगु थिचो मिचो मजुगु ।

पलख दिडः वं धा धां यंकल - बहुदलीय प्रजातन्त्र व संबैधानिक राजतन्त्रतय् जुजुं बचं प्वंकसां जुजुया नायो सुई व हदाय चवडः याडगु ज्या स्वयबलय् ग्व गथे संबैधानिक राजतन्त्र व बहुदलीय प्रजातन्त्र धाय् फै ? राजनैतिक पार्टीतय्गु घोषणापत्रया लिधंसाय् निर्वाचित प्रतिनिधिसभा मजूसें, उगु सभां ल्योपुं सरकार मजूसेलीं गथे व बन्दोबस्त बहुदलीय व्यवस्था व संबैधानिक राजतन्त्र जुय फै ? थुकिता जिं बेलायत, जापान व मेगु छुं संबैधानिक राजतन्त्रया बहुदलीय प्रजातन्त्रनपां दाडः स्वय ताडा, जियां छुं गनां हे मिलय जूथें, मखाडा ।' वं ताः हाक सास ल्हात ।

च्यापसलय् ज्यासानिम्हा छम्हा मिजं मचां चाउमिन नय धुंकगु रिकापीत

मुडः यंकल अलय मेम्हा मिजं मचां चिया त तं यंकल । धेबा पुपुं छुं ग्राहकत प्याहाँ वानसा छुं भाति न्हँपुं गह द्रहँ वयो खास खुस खाँ ल्हाडः चवन । मिसामचा- मिजंमचात बुलुहुं च्या त्वडः चवना । अलय छगू कुंचाय् चवंगु टेबुल्य् वियर सिसीया चाकलिं छुं ई न्हयो निसँ चवडः चवंपुं मध्ये छम्हा ल्याम्होचाम्हासिं मेपुं ग्राहक पिनिगु खाँ ध्यान तयो न्यडः चवना । वयागु म्हागवः ला, बांला । तःतः

साँच्याड तःगु नं खोलय जु । अलय नं यचुक सादा फियो तःगु दः । वं बवनामिपुं व कर्मचारी थें चवंपुं ग्राहक पाखय् स्वयो धाल - 'स्वयोदिसँ दाजु किजापुं जि १२/१३ दा जागिर नय धुन । अःजि ३०/३२ दाँ दय धुंकल । जिं हिगू तगिं जक बवडः तयागु दः । जिके उलि राजनैतिक सिद्धान्तयां मव । जिं न्हय्दातक सुराकी (चिव काय्गु) खय् जागिर नया । डादा खुदामन्त्रीतय्म्हा गार्ड जुयो सेवा याडा ।'

वं म्हासिडका पिबवय् वं बवनामिपुं, शिक्षकपुं व कर्मचारीपुं छक वाताहाँ चवन । फुक्कसिनं च्या त्वनय मधुंकनि । लकस अथें अथें शान्त जुयो चवंगु । शाही घोषणां फुक्कसिया मनय् अःछु जुई धाय्गु वाडः चवंगु जुल । उगु इलय् सादा पोशाकय् चवडः चवम्हा सुरक्षाकःमि याय्गु राजनैतिक पहःलं खाँ ल्हाडगु ढड्गं गुम्हासियां न्हयल्य् मःसि वलसा गुम्हासियां शंका जुल छाय्धःसा

वं वियर त्वडः चवंगु दः । अलय सकलसिया ध्यान धःसा व याय्कय् हे लाडः चवंगु दः ।

सादा पोशाकया पुलिसं धा धां वान - "जिगु नां मदन कार्की खः । न्हय्दातक जिं नेतातय्गु भाषण ल्हयया अलय जाहेरी याडा । उकिं नेतातय्गु गुलिं भाषण जिकय् कण्ठ व अलय जिकय् तःतः

खः दक ? फुक्क मुख्य मुख्यपुं नेतात छँ छँसं बन्दी याय धुंकल । देश अः छु जुई धाय्थें जुयो वल । म्हतुं प्रजातन्त्र धःसां नं सड्कटकाल धाय्गुयां सैनिक शासन हे खः ।'

मदन कार्की धाधां वान- छम्हा डाक्टर अर्थमन्त्रीया निर्वाचनय जि नपां हे दः । उबले मन्त्री जु नपां भाषण मखु वयकया छँगुया भोला (ब्रिफकेश) द्वछि-द्वछि वांगु नोट जाय्कः दः । वयक गना गना भाला आना खसी, थूमँ स्याडगु जातकाथंया गामय, थःगु हे पार्टीया नेतात थ वं थवय् दायो दायो नं ल्वाडगु अलय लाहा तुति त्वः थुलिगु । च्यापसल्य् च्या त्वडः वयकलं थः गु जक धेबा पुलः जिता धाई- क भाइ, जियां अमेरिकन पहः या मनू, जिं थःगु धेबा पुलय धून, छं थःगु धेबा पु' । वयागु खाँ न्यडः फुक्क छक अजु चाइ । मन वाय्कः छक फुक्क सिया न्हँगु खाँ छक न्यनय्गु मन याता । मदन धा धां यंकल - निर्वाचनय

मन्त्री जुं जिता वयकया ब्रिफकेश (छँगुया भोला) बचय्यो भाइ दक धायोदि । जिं वयकता जिगु ज्या छिता सुरक्षा बियगु खः ब्रिफकेशता मखु धाया । उगु जिल्लाय् यें निसँ अपा हयो दांगु छखा न्हय्गु तलाया छँ छखा दः, उकि ६४ क्व क्वथा दः । उगु छँ या कःसि हेलिकप्टर दिकी, बवयकी । भी गुलिं म्हाय् मस्त आना नं बम्बैड मिम यंकिगु



हांगु सिद्धान्तया खाँ मव । डादातक जिं पि.एच.डि. याडः तःम्हा छम्हा अर्थमन्त्री, छम्हा गृहमन्त्री व छम्हा उद्योग वाणिज्य मन्त्रीया सुरक्षा गार्ड जुयो ज्या साडा' वं प्वंगु गिलास बियर जायकला । उगु इलय न्हँपुं गहत हा हां द्रहँ वल "गना

आना तः हाम्हा हे मनू च्वनिगु, निर्वाचन त्याकय बुकयगुलि वयागु तःहांगु लाहा दैगु । भनीगु प्रजातन्त्र थथेयाडः न्ह्याकिगु ।’

“गृहमन्त्री व उद्योग वाणिज्य मन्त्रीयां भनीथाय् मसँ (तराई) सं च्वंम्हा । जिं वयकपिन्ता बांलाक म्हासिया । त्वाथय ग्वः, चप्पल न्ह्याडः भोला ज्वं जुइपुं भनीपुं मन्त्रीत म्हवचा इलय हे पहः हिइकल । वयकपिसं भनीपुं तःम्हा मनूतय्ता भन्सारया चौकीपाखय् व सुराकीखय् जागिर नक बिला ।”

भातिचा बांलागु नं फियो च्वंम्हा छम्हा ल्याम्होचाम्हासिं खाँ त्वाल्हाडः धाला “छु पञ्चमन्त्रीत जक चोख जक धाय ताडागु ला ?”

‘अहं मखु, पञ्च मन्त्रीतय्गु ज्या सानिगु पहः व प्रजातान्त्रिक धःपुं मन्त्रीतय्सं ज्या सानिगु मपा, मनूजक पाता ज्या छतिं हे मपा ।’ सुराकी कार्की अःपुक लिसः बिल । च्यापस पलख सुनसान जुल ।

थःगु चियाया ल्यं दःगु छधुतु त्वं-त्वं न्हचं निसं खाँ न्यडः च्वंम्हा मिसा मचां भातिचा तःसलं धाल “अथेजूसा प्रहरी सेवाम् भ्रष्टाचार मरु धाय् ताडागुला ?

मखु, भ्याभाति हे मखु’ प्रहरी, प्रशासन वा कर्मचारीतन्त्र नं भ्रष्टाचारं मुक्त जुगु जूसा श्व माओवादी धःपिनिगु न थुलि ज्या इवः हज्याकयपै, नत अमिकय् उलि आत्मविश्वास हे दैगु ?’ मदन कार्की छत्थुं हे लिसः बिल ।

ध्वला ध्वला दःगु कोट फियो तःम्हा शिक्षकं खाँ क्वचाय् केगु मतिं नाईकः धाल- ‘पार्टी नेतातय्ता जक दोष बियां छुयाय? प्रहरी भाइ नं धःथें पदय्

चवडा पुं भनी राष्ट्र सेवकत हे देश व जनताता स्वयो थःथःगु परिवारता जक स्वइपुं जुसेलिं छु याय्गु ?’

छक चाकलिं स्वयो वं धा धां वान- ‘भनी जनतात नं अथे हे । धेबा नयो भनीसं भोत बियगु, जागिरया लोभय, ठेक्कापट्टाया लोभय व प्रोजेक्टया लोभय भनीसं भोत बियगु । उलिजक गना खः दक ! शिक्षक, डाक्टर, प्राध्यापक, इन्जिनियर थजपुं बुद्धिजीवीत नपां सरुवा बहुवा, महाप्रबन्धक, रजिष्ट्रार, राजदूत व उपकुलपति जुयगु मतिं भोत बिइगु । दे थौया स्थिति थयंकगुलि दोषी ? धायगु स्वयो नं दोषी सुजक मखु दक चिन्ताछिकाय् काय् माला ?’

मिसामचाता न्यनय्गु हे धैर्यमत भातिचा तःसरं न्हयसः तल- ‘अथे जूसा छु समाजय बांलापुं मनू हे मत ला ?’

वयाय्गु अधैर्यता खाँ अजनं ताः हाइगु मतिं तुइचा ख्वम्हा मिजंमचां धाल- ‘अथेयां गना खः दक ? समाजया अपलं जनतात बांलापुं सोभा, सिधापुं दःनि । ५-७ प्रतिशत बाँमलापुं मनूतय्सं समाजता स्यंकः च्वंगु दः । प्रजातन्त्र लिता ह्यधुंकः नेम्हा प्यम्हा नवधनादय (नकतिनि तःमिपुं) लखपतिं करोडपति जुल, करोडपतिं अर्बपति जुल, गुलि फयखः (हवाइजहाज), तःतः हांगु तारे होटल, उद्योग व व्यवसायया मालिक जुल । गुलिसिनं बिदेशी बैंकय् धेबा तय यंकला । गुलिसिनं विदेशय ज्यामि छ्वइगु म्यानपावर कम्पनी चायकः छ्यापं नय्गु धेबा कमे याय्गु ज्या याता । जनतातय्गु करोडौं तका प्वः चिडः, स्वथाडः विदेशीया च्यो भ्वातिं (दलाली) जूयो गुलि नेपःमिपिनिगु ज्यान काला । थजगु स्यंकय्गुलि अपुं जिम्मेवार मखुला ?

पलख दिडः वं हकनं तान- ‘उकिं गां निसं सहरतकया छम्हा छम्हा मनू राजनैतिक ज्ञानं सय्कः थुइकः व आलोचक मजुइक देश भिकः हज्यायता थाकुई ।’

कार्की ख्वः स्यंकः बियर गिलास क्वचाय्कः धाल अथेसा थुकाथं स्वयबलय् छु बबनामि, शिक्षक वा राजनैतिक कार्यकर्तात जक इमानदार धाय ताडागु खःला?

“मखु अथे मखु ?” मिसामचां मिजंमचाया खाँ खय् पाजुता उब्ले हे थ कर्मचारी पासां ब्यूगु खैनी मय् धाधां कपः सांकः ध्वला-ध्वालागु कोट फियो च्वंम्हा शिक्षकं बुलुहुँ खाँ मिलय् याय्गु पहलं धालः -‘जनता, कार्यकर्ता ब्वनामिपुं, शिक्षक फुक्क इमानदार जूगु जूसा समाज थापासिकं गथे छ्यूई । गुलिं राजनैतिक कार्यकर्ता ल्यासे ल्याम्होपुं व ब्वनामिपिसं नेतातय्ता मखु मखुगु खाँ कानि अलय् मखुगु खाँय निपं बिई । त्याग, तपस्या व बलिदानया खाँ ल्हाइपुं थः हे साहित्यिक व शैक्षिक ज्या इवः या ब्वनापौं ई बलय् वा चन्दा कः वानि बलय् मोटरसाइकलय् पेट्रोल (चिकं) तय्ता ध्यबा काई, नेस प्यस टेलिफोनया धेबाया नामय् नेट्र-स्वट्र धेबा काई अलय् कःगु धेबा नं समिति बिई मखु । हकनं अमिगु हे खाँ ल्हाडः जुई ।

नेम्हा प्यम्हा न्हूंपुं गहः हकनं द्रहँ वल । स्थिति सिइक शिक्षकं धाल - नु बहनी जुइन, सन्ध्याक जुल छँ वानय् मनि, छँ भातिचा तापानि ।’ न्हपानिसं च्वडः च्वंपुं छम्हा छम्हा यायां प्याहाँ वान । छ्यूंथाय् खानय् मदय्कः ताडः वान ।

जनताया ग्वाहालीं लक्ष्मी नरसिंह देगः मथां दानय् धुंगु

- नारायणमान बिजुक्छें (रोहित) नायो नेमकिपा

लक्ष्मी नरसिंह देगः दानय्गुलि ग्वाहालीयापुं सकलसिता सुभाय देछाय् । जनतानपां मिलय जुयो ज्या सांसा न्ह्यागुनं ज्या अःपुक क्वचाय्के फै धाय्गु दसु थुगु लक्ष्मी नरसिंह देगः दानय् धुंकः सावित जुयधुंकगु दः । थुगु देगः सरकारपाखं दयकगु जूसा गुलि ई बिकीगु ? गुलि भ्रष्टाचार जुइगु जुई ? जक ल्याखाय् हे थाकु । जनतात हे मिलय जुयो सार्वजनिक सम्पति ल्यंकः, म्वाकः, भिंकः तय्गु ज्याखय् जूसेलिं ज्या नं मथां सिधैगु अलय न्हूगु पुस्तां ज्यानं सय्के दैगु जुल ।

नरसिंह धाय्म्हा शक्तिया प्रतीक (बल्लाया चिं) खः । थुगु देगः या नरसिंह छो वं लक्ष्मीता घयपुड बुयो तःगु खानय् दः । व धाय्गु शक्तिया चिं जक मखुसैं सन्तुलन (उथिं ग्यंगुया चिं) प्रतीक नं खः धाय्गु कयं । उकिं फुक्क जनतातय्सं बलं न्ह्यागुनं त्याकय धाय्गु मतितःसा व मखुथाय् लाई । गथे साम्राज्यवादी दे बेलायत, अमेरिकां थःगु शक्तिया लिधंसाय् चिच्या-चिच्याहांगु देशता थः गु लाहातय् लाकय् तांगु खः व ज्या अः बुलुहुं म्हवैं जुयो वांगु दः । बल्लाडांजक मज्य, बांलागु व्यवहारनं याय्मः धाय्गु थुकिं कयं ।



भीगु देया कला-संस्कृति, मथ-देगःत, फल्चाः, सत, फुक्क भीगु म्हासिइका खः । थुकिता ल्यंकः, म्वाकः व भिंकः तय्गु भीगु कर्तव्य खः । कर्मचारी पहलं न्हिबिकय्गु काथं जक ज्यासांसा ज्या बांलाइ मखु । जनतां यागु ज्या खय् अथे जुइमखु थःगु धाय्गु भावना ब्वलानि । अलय भिंकः बांलाकः इलय् हे ज्या सिधै । जनतां स्वार्थ मतःसिं देश व जनताया सेवा याई । अजपू ज्या साडः नैपुं श्रमजीवीपिन्ता सलाम (भाग्या) धाय् ।

प्रकृतिं भीता जङ्गल, फय्, नाः, सिमा-स्वमा, चा



फुक्क ब्यूगु दः । भीगु म्हासिइका धाय्गु कला-संस्कृति हे खः । थुकिता ल्यंकः म्वाक तय फःसा जक भीसं थःगु म्हासिइका म्वाकः तय फै । सकलसिया थजगु ग्वाहाली दयो हे थव देगः इलय हे दानय् धुंकय् फःगु खः । देगः दानय्गुलि सकलसिया क्वसःगु नुगलं ग्वाहाली यागु खानय् दः । गुम्हासिं चन्दा बियो, गुम्हासिं मःगु दानय्ता हलं ज्वलंत बियो, गुम्हासिं ज्याखं ग्वाहाली बियो श्रद्धाभावं ग्वाहाली यागु खानय् दः ।

थुगु देगः दानय्ता लागत इस्टिमेट ७ करोड ७७ लाख तका तुई धः सांनं नगरपालिकां ४ करोड ८३ लाखय् हे दानय् धुंकगु जुल । सरकारयापाखं ज्या यागु जूसा ७ करोडं हे थुगु ज्या सिधय्कि मखु । धेबाखय चलखेल, आर्थिक अनियमितता अपलं ज्वी । चवयनिसैं क्वय थयंकयायपुं मिलय् जुयो इडः नैगुलिं अपलं भ्रष्टाचार जुइगु यक्व हवप्वः खानय् दः । जिपुं जिल्ला-जिल्लाय वानय् बलय् न्यनिगु-खवपय जक गथे बांलाक ज्या जुला ? मेथाय-मेथाय छाय ज्या मजुला ? खवप देशय ग्वाहालीयायगु मतिं ज्या सानिगुलिं थाना बांलाक ज्या जुइगु दक लिसः बियगु याडा । देगः दानय्गु ज्या सांपुं सकल कालिगढ, प्राविधिक निसैं खानय दय्क व मदयक ग्वाहाली यापुं सकलसिता लःस हांसे, सुभाय् नं देछाय् ।

(२०८२ जेठ ६ गते खवप नगरपालिकाया ग्वसालय जूगु खवप नगरपालिका वडा नं. ४ गःहिति चवंगु लक्ष्मी नरसिंह देगः उलेज्या ज्या इवः सं नेपाल मजदुर किसान पार्टीया नायो भाजु नपां वरिष्ठ राजनीतिज्ञ नारायण मान बिजुक्छें (रोहित) जुं बियो द्यूगु न्वचुया सार)

खप नगरपालिकाय जनप्रतिनिधिया बहाली स्वदाफूत

खप नगर प्रमुख सुनिल प्रजापति

हानय वहपुं नगरबासी दाजु किजा, तताकेहेंपुं,

अपलं जनताया साथ अलय ग्वाहालीखय् खप नगरपालिकाय जिपुं चुनावं त्याकः वाडः सपथ ग्रहण याडागु थौ सं स्वदा फूत । नेपः या संविधान काथं जगु स्थानीय तहया नेकगु निर्वाचन लिपा त्याक २०७९ जेठ ६ गते थौ खुनुं निसें हे जिमिसं ज्या याडागु खः । उगु इलय सकल जनता व मतदातातय दश्वी जिमिसं निर्वाचन घोषणापत्र काथं ज्या सानयगु बचं बियागु खः । थौ तकया दिनयूतक निर्वाचन घोषणापत्रया लिधंसाय् जिमिसं ज्या याड वयागु खः । संविधान व कानून ब्यूगु अधिकार दुनय् चवडः थौ थौ विकास निर्माण व मेमेगु ज्या बाहेकं दायें दायें पतिकं छगू नगरस्तरीय महत्वपूर्ण योजना क्वचाय्केगु तातुडः जिपुं हज्याडः चवडागु दः । न्हांगु दायें खप अस्पतालया न्हूगु भवन उलेज्या, नेगूगु दायें 'भाज्या पुखु' उलेज्या क्वचाय्का । वांगु दायें थं खुन्हुया दिनय् हे खप नगरपालिका वडा नं १० य् चवंगु टेबुलटेनिस कभर्ड हल व तिलगड्गा आँखा अस्पताल उलेज्या याडा । थौ सुथाय् खप नगरपालिका वडा नं ४ गः हिति चवंगु लक्ष्मी नरसिंह देगः दानय् धुकः नेपाल मजदुर किसान पार्टीया नायोभाजु नारायण मान बिजुक्छें (रोहित) जुं उलेज्या याडः दिल ।

खप दे कला व संस्कृति जःगु प्राचीन नगर खः । थानाया मूर्त व अमूर्त सम्पदात भीगु अमूल्य सम्पति खः । उकिता ल्यंकः, म्वाकः, भिंकः तयो वैगु पुस्ताता लः ल्हाडः बियागु जिमिसं जिमिगु कर्तव्य व जिम्मेवार मति तया । उकिया लागिं जिमिसं कला व संस्कृति ल्यंकः, म्वाकः, भिंकः तयगुलि मदिक्क ज्या न्ह्याकः चवडा ।

नाचगानया राजधानी, सांस्कृतिक नगर व म्वाडःचवंगु संग्रहालय काथं हलिमय म्हासिइका पिब्वयो हज्याडः चवंगु थुगु खप दे या न्हयलुवा याडः चवडाबलय् जिमिता गर्व मति वाडः चवंगु दः । भी न्हयलुवापिसं याडः वांगु त्याग, परिश्रम व दुःख या लिचवः काथं खप दे थौया अवस्थाय् तक थ्यंकय् फःगु खः । पदय चवडः वा मच्वंसे नं समाजय् ह्यूपाहयता खानय् दयकः व मदयक योगदान याडः द्यूपुं व सकल न्हयलुवा राजनैतिक नेता, कार्यकर्ता व सामाजिक कार्यकर्तात नं जनतातय्ता थौया दिनसं उच्च सम्मान देछाय् ।

राजनीतिक दलया नेतात कन्हेया कल्पनाशीलपुं, जूसा, देश व जनताखय् क्वसःपुं जुसा मथां विकास हछ्याय् फैं धाय्गु



छगू दसु खप दे जुयो चवंगु दः । नेपाल मजदुर किसान पार्टीया नायो भाजु का. नारायणमान बिजुक्छें (रोहित) जुं चवयो द्युगु 'सच्छिदा लिपाया खप दे' साफू व हिंदादा दुनयें 'छछा छें छम्हा स्नातक' दयकेगु खाँ क्वछिडः खपया आर्थिक, साँस्कृतिक व सामाजिक लागाय ह्यूपा ह्यता लिधंसा व लाँपू जुयो बिल । उगु साफुं खप दे हज्याकय्ता तःदा लिपातक लाँपू क्यडः चवनिगु जिमिगु विश्वास खः ।

स्थानीय तह प्रजातन्त्रया जग खः उकिं स्थानीय तहता अधिकारं जायकः यंकय् फःसा जक प्रजातन्त्र बल्लाई धाय्गु मान्यता ज्वडः जिपुं हज्याडः चवडा । न्हूगु संविधान छ्यलय हःगु हिदा फुय धुडानं संघीयता बांलाक छ्यलय फःगु मरुनि । कर्मचारी भर्ना याय्गु अधिकार स्थानीय तहता मब्यूगु, चिच्या-चिच्याहांगु योजनात नपां संघ व प्रदेशया बजेटय् स्वथानिगु, स्थानीय तहता बिइगु समानिकरण बजेट म्हवचा यायां यंकगु, अलय स्थानीय तहपाखं तलब नैपुं शिक्षकपिन्ता नियन्त्रण संघ सरकारया लाहातय् हे लाकः तःगु संघीयता छ्यलयगुलि पंगः खः । खप नगरपालिका व फुकं पंगः तय दश्वी नं थःगु तुतिखय् दानय्गु थाकुगु लाँपुतिं विकासया लायें हज्याडः चवंगु दः ।

जिमिसं दायें दायें पतिकं नीति व कार्यक्रम अलय बजेट पाखं वार्षिक कार्य योजना पिब्वयो वयागु दः । चालु आ.व. २०८१/८२ या नीति व कार्यक्रम २०८१ असार ७ गते बजेट असार १० गते पिब्वयो पारित जुयो बजेटया लिधंसाय् जिमिसं ज्या साडः वया । देश व जनताया इमानदार, जुयगु हे राजनीति खः धाय्गु मान्यता कः घाडः जनप्रतिनिधिपनिगु

क्षमता फःतलय खवपया शिक्षा, स्वास्थ्य सुचुकुचु, सम्पदा ल्यंकः म्वाकः तयगु, विकास निर्माण थजगु ज्यायाता हृदाय तयो ज्या साडः वया । आ.व.२०८१/८२ सं नगरपालिकाया ज्या इवःत छसिकाथं पिढवय-

आयपासय

चालू आ.व. २०८१/८२ सं आन्तरिक पाखय् रु ६५ करोड ८३ लाख १० हजार व वाह्य स्रोत पाखय् १ अर्ब ८० करोड २२ लाख १८ हजार, वांगु दायँया ल्यँ दःगु मौज्जात २० करोड ३७ लाख ८२ हजार याडः मुक्कं दां २ अर्ब ६६ करोड ४३ लाख १० हजार स्रोत वयफ धःगुलि चालू आ.व. २०८१/८२ या हिलादुनय् मुक्कं आन्तरिक आय रु. ४४ करोड ९५ लाख ३५ हजार राजश्व मुनय् धुंगु दः । उगु धेबा चालू आ.व. या तुलनाया ६८ प्रतिशत खः । वांगु दायँ वहे ईयाता स्वयबलय् आन्तरिक आय खय् ४ करोड २ लाख ३५ हजार तकां अपः दःगु खः । श्व वांगु दायँ स्वयो १० प्रतिशतं अपःदःगु खः । व्यवसाय कर मुनय्गु व दर्ताया लागिं कर टोलीत परिचालन, भक्तपुर औद्योगिक क्षेत्रया कर मपूणं उद्योगतय्ता कारवाही याडः करया दायराय् ह्यागुलिं गैर पर्यटन पाखं वैगु राजश्व अप्वयो वगु खः । अथेहे पर्यटन शुल्क पाखं वैगु राजश्व नं वांगु दायँ स्वयो अपः वगु दः ।

नेपाल सरकारपाखं राजश्व बाँडफाँड पाखय् चालू आ.व. सं ६ करोड ८९ लाख ६८ हजार, अथेहे वित्तीय समानीकरण, सशर्त, समपूरक व विशेष अनुदान याडः मुक्कं ४६ करोड २७ लाख ५१ हजार मालपोत रजिष्ट्रेशनपाखं २ करोड ५८ लाख ९३ हजार वगु दः । बागमती प्रदेश सरकारपाखं श्वहे आ.व. खय् वित्तीय समानीकरण, सशर्त, समपूरक व विशेष अनुदान याड मुक्कं धेबा १५ करोड ६५ लाख ५५ हजार तका, सवारी करया राजश्व बाँडफाँड पाखं १ करोड ६८ लाख ८२ हजार वगु खः । थुकाथं आंतरिक व बाह्य याडः मुक्कं २ अर्ब ६६ करोड ४३ लाख १० हजार आय वै धःगुलि २०८२ वैशाख मसान्त तकखय मूक्कं १ अर्ब ६७ करोड २३ लाख ३३ हजार वयो मति तःगु आय स्वयो ६३ प्रतिशत प्रगति जूगु दः ।

व्ययतर्फः

चालू खर्च पाखय् १ अर्ब ५७ करोड ३ लाख ५३ हजार छखय लिइकगु बजेट मध्ये २०८२ वैशाख मसान्त तकखय रु ९२ करोड ४६ लाख ७० हजार खर्च जुयो छखय लिइकगु धेबाया ५८.८८ प्रतिशत, पुँजीगत खर्च पाखय् छखय लिइकगु धेबा ९९ करोड ४० लाख मध्ये ३५ करोड ७१ लाख ९० हजार खर्च जुयो ३६ प्रतिशत प्रगति जुगु दः । वित्तीय व्यवस्था पाखय्

सच्छि व डय्च्यागूगु स्वप पौ, ब.च्छि पौ(पाक्षिक)

१० करोड छखय लिइकगु बजेट मध्ये वहे इलयतक रु ६ करोड २८ लाख, ५४ हजार खर्च जुयो छखय लिइकगु बजेटया ६२.८५ प्रतिशत खर्च जुगु । थुकाथं चालुपुँजीगत ९ वित्तीय व्यवस्थापाखय् मुक्क छखय लिइकगु रु. २ अर्ब ६६ करोड ४३ लाख ५३ हजार (५०.४७) प्रतिशत वित्तीय प्रगति जुगु दः ।

शिक्षा:

खवप नगरपालिकां म्हवचा धेबां दांकः, भिंकः शिक्षा बियगु तातुडः चायकगु नेगू इन्जिनियरिड कलेजनपां न्हयगू व्वनयकुथिसं ७७ गू जिल्लाया न्हयद्व स्वयो अप ब्वनामिपुं ब्वडः च्वंगू दः । नगरपालिकां शिशु स्याहार केन्द्रनिसं स्नातकोत्तर तगिंतक जनताया काय म्हायपिन्ता शिक्षा ब्यू ब्यू वयो च्वंगु दः । खवप विश्वविद्यालय चायकेता जिपुं मदिकक ज्या साडः च्वडागु दः ।

खवप इन्जिनियरिड कलेजय् वि.सं. २०५८ निसं २०८२ साल तक खय् ७७ जिल्लां ५ हजार २६५ ब्वनामिपुं कलेजय भर्ना जुगु दः । खवप जिल्लां दकलय् अपः ब्वड च्वपुं खुईस्वसम्हा ब्वनामिपुं भर्ना जुगु खः । मिसामस्त अपलं भर्ना जूगु खानय् दः । अः ब्वडः च्वपुं ब्वनामिपुं मध्ये थ्यं मथ्यं ३९.५ प्रतिशत मिसामस्त खः । खवप इन्जिनियरिड कलेजया फुक्कं स्नातकोत्तरया ज्या इवः तयता नेपाल इन्जिनियरिड काउन्सिलपाखं थुगुसी स्थायी मान्यता बिय धुंकल । थुगु उपलब्धी नेपाल इन्जिनियरिड काउन्सिल धायो तःगु मू मू मूल्याङ्कन (ल्यज्या) लागाय् कलेजया च्वजःगु पिढवयापाखंया लिचवः जुयफःगु खः ।

पूर्वाञ्चल विश्वविद्यालय पाखं स्नातक तगिं कम्प्यूटर एप्लिकेशन (४८ सिट) व इन्फरमेसन टेक्नोलोजी (४८ सिट) न्हयाकय्ता स्वीकृति बिय धुंकल सा श्वहे शैक्षिक सत्रनिसं उगु विषयत न्हयाकिगु जुल । उगु विषयत न्हयाकय् धुनकिं क्याम्पसया चाकः तः चाक जुइगु अलय प्रविधि लागाय् दक्ष जनशक्ति ब्वलांकय्गु जिमिगु तातुना खः ।

थुगु कलेजय् स्नातकोत्तर, एम.ई इन अर्थक्वेक इन्जिनियरिड, ज्याइवः या ब्वनामि मेधास्मी खतिवडां ३.८८ सी. जि. पि.ए. नपां थःगु अध्ययन क्वः चायके धुंकलसा पूर्वाञ्चल विश्वविद्यालयया १३ कगु दीक्षान्त समारोहसं विश्व विद्यालय स्वर्णपदक, स्वर्गीय दिल्ली बहादुर अधिकारी स्वर्ण पदक नारायण प्रसाद कोइराला स्वर्णपदक याडः स्वंगु च्वजःगु पदक, हानय् धुंकगु जुल ।

नपां २०७५ सिभिल समूहया विकास पाण्डे पूर्वाञ्चल विश्वविद्यालयया १३ कगु दीक्षान्त समारोहसं स्नातक तगिंया समुहखय् च्वजगु पिढवज्या यागुलिं डा.राम शोभना पोखरेल स्वर्ण पदक हांगु जुल ।

खवप इन्जिनियरिङ कलेज व खवप कलेज अफ इन्जिनियरिङ कलेजया मंकः गवसालय नेगूराष्ट्रिय सम्मेलनत तःलाक क्वचाय धुंकल । राष्ट्रिय भूकम्प सुरक्षा दिवसया लसताय राष्ट्रिय भूकम्प इन्जिनियरिङ सम्मेलन (NCEE) २०८१ माघ ५ गते क्वचाल । अथेहे विश्व सम्पदा दिवसया लसताय प्यकगु राष्ट्रिय सम्मेलन- वास्तुकलाया प्रवृत्ति व सम्पदा (NCATH) २०८२ वैशाख १५ गते क्वः चगु खः । २०८२ माघ महिनाय् भूकम्प इन्जिनियरिङ व विपद लिपा पुनः निर्माण योजना (ICEEPORP) नांया प्यकगु अन्तरराष्ट्रिय सम्मेलन याय्गु कुतः जुयो चवंगु दः ।

खवप कलेज अफ इन्जिनियरिङ निःस्वांसां निसैं अःतक खय २७६९ म्हा व्वनामिपुं भर्ना जुयो व्वडः चवंगुलि अःतकखय् १५६४ म्हा व्वनामिपिसं अध्ययन क्वचायके धुंकल । थुगुसी खवप कलेज अफ इन्जिनियरिङ स्नातक तगिं सिभिलया व्वनामि गौरब भुषालं सिभिल विषयसं त्रिभुवन विश्वविद्यालय खय् न्हाप जुयो कलेजया नां चवछायो ब्यगु दः । खवप कलेज अफ इन्जिनियरिङ विश्व विद्यालय अनुदान आयोगं क्यएए काय्ता कुतः जुयो चवंगु दः ।

खवप बहुप्राविधिक अध्ययन संस्थान प्रमाणपत्र तगिं नर्सिङसं शैक्षिक वर्ष २०८१/८२ तक मुक्कं ८०० म्हा व्वनामिपुं भर्ना जुगुलि ६७५ जना व्वनामिपुं पास जुयो थः थः गु कार्यक्षेत्रसं ज्या साडः चवंगु दः सा स्वंगू तगिं अथेधाय् ११९ म्हा व्वनामिपुं व्वडः चवंगु दः ।

थुगु अध्ययन संस्थानया नर्सिङ स्वंगूगु दाँ खय् व्वडः चवंगु २०८१ भाद्र महिनाय् जूगु नेगूगु दाँया परीक्षासं परीक्षा ब्यपुं ३६ म्हा (९२.३१५) व्वनामिपुं विशिष्ट श्रेणीखय् व स्वम्हा व्वनामिपुं प्रथम श्रेणी पास जुगु खः । अथेहे डिप्लोमा इन सिभिल इन्जिनियरिङ विषयलय् शैक्षिक वर्ष २०७९/८० तक मुक्कं ८७० म्हा व्वनामिपुं भर्ना जूगुलि अः तक खय् ५६५ म्हा व्वनामिपुं पास जुय धुंकल ।

थुगु अध्ययन संस्थाय् थप प्राविधिक शिक्षा बिय्ता न्हिल्या २०७९ -०७-१५ गते सामान्य चिकित्सा (H.A.), फार्मेसी, रेडियो ग्राफी व ल्याव टेक्सिसियन विषयत न्ह्याकय्ता सम्बन्धन स्वीकृति याकय्ता प्रस्ताव पेश याडागुलि न्हिल्या २०८१ चैत्र १७ गते न्हपांगु चरणया स्थलगत निरीक्षण क्वचाय्कः स्वीकृतिया चरणाय् चवडः चवंगु दः । खवप कलेज अफ ल चाय्कगु स्वदा दत । थुगु अवधि दाय् खुइम्हा ल्याखं १८० म्हा व्वनामिपुं व्वडः चवंगु दः । थुगुसिया परीक्षाखय् खवप कलेज अफ ल या व्वनामिपुं ९७ प्रतिशत परीक्षासं उत्तीर्ण जुयता तः लागु दः । थुगु कलेजय् ४२ गु जिल्लाया व्वनामिपुं व्वडः चवंगु दः ।

सच्छि व डय्च्यागूगु स्वप पौ, बःछि पौ(पाक्षिक)

खवप मा.वि. सं हिंछगू व हिंन्यगू तगिंखय स्वद्व व न्हयसम्हा स्वयो अपः व्वनामिपुं व्वडः चवंगु दः । कलेजपाखं विज्ञान, मानविकी, व्यवस्थापन व कानून याडः अः तक खय २५, ५३३ म्हा व्वनामिपुं व्वडः चवंगु दः । दाय् दाय् पतिकं १ करोड ३० लाख स्वयो अपः धेबाया छात्रवृत्ति बियो वगु दः ।

अथे हे २०८२ जेठ ८ व ९ गते खवप कलेजया गवसालय वातावरण, सुशासन व दिगो विकास विषयसं प्यकगु राष्ट्रिय सम्मेलन जुइगु जुयो चवंगु दः ।

खवप नगरपालिकां सामुदायिक व्वनयकुथिया शैक्षिक सुधार व भौतिक निर्माणया लागिं ५० लाख व नेपःया सरकारया सशर्त बजेटपाखं मुक्कं ३ करोड ८६ लाख याडः थुगुसी ४ करोड ३७ लाख तका व्वनयकुथितय्ता आर्थिक ग्वाहाली यागु दः ।

स्वास्थ्यः

खवप नगरपालिकां १०० गू शैय्याया अस्पताल चाय्कः वगु दः । अथेहे श्वास प्रश्वास पुनः स्थापना केन्द्र, जनस्वास्थ्य केन्द्र, सहरी स्वास्थ्य केन्द्र व आधारभूत स्वास्थ्य केन्द्र पाखं स्वास्थ्य सेवा बियो वगु दः । खवप अस्पतालं दाच्छिखय् ३६५ न्हंतुं (११ घण्टा) हिंछगौ तुं ओपिडी सेवा बियो वगु दः ।

चालू आ.व २०८१/८२ या वांगु हिलाखय् ७४ गू जिल्लाया २ लाख ३३ हजार ६३३ म्हा बिरामीपिन्ता सेवा बिय धुंकगु जुल । अः खवप अस्पतालय् चिकित्सक, नर्स व कर्मचारीत याड २३५ म्हा जनशक्ति छ्यलः चवंगु दःसा विशेषज्ञ चिकित्सक ३५ म्हा व मेडिकल अधिकृत १८ म्हा सिनं सेवा बियो वगु दः । चालू आ.व. २०८१/८२ सं खवप अस्पतालय् युरोलोजी (मुत्रथैली) सेवा, नेफ्रोलोजी (मृगौला) सेवा, एन.पि.एल. सेवा (न्हाय, न्हयप, घाँटी या इन्डोस्कोपी) कोल्योस्कोपी सेवा, ल्याप्रोस्कोपी सेवात ताडः सेवा बियो चवंगु दः ।

२०८१ जेठ ६ गते नेपाल मजदुर किसान पार्टीया केन्द्रीय नायोभाजु श्री नारायणमान बिजुक्छे जु पाखं उलेज्या याडः द्यगु खवप तिलगड्गा आँखा अस्पतालं हिलादुनय् २४,५४४ म्हा मिखाया ल्वगिपिनिगु उपचार याय् धुंकल सा वहे इलय ८८६ गवः मिखाया अपरेशन याय् धुंकल । थुगु इलय आयुर्वेदिक स्वास्थ्य सेवा केन्द्रपाखं २,७६३ म्हा पिसं स्वास्थ्य उपचार काय धुंकलसा छेँ छेँ नर्स पिसं २३,५०६ खा छेँखाय् याडः मुक्कं ७० हजार ४७ म्हा जनतनपां स्वापु तयो सामान्य स्वास्थ्य सेवा ब्यगु रेकर्ड दः ।

थुगु इलय नगरपालिकां नगरबासी पिन्ता ११,३७७ गवः सिलिण्डर अक्सिजन धेबा म्वाय्क निःशुल्क इडः बिलसा नगरवासीपिन्ता निःशुल्क हि बियो ब्यगु बापत १५ लाख व

खुदतका दां भुक्तानि यागु जुल । कडा लव्य जूपुं १८९ म्हा सिता थुगु आर्थिक वर्षय छम्हासिता हिंदाद्र ल्याखं २८ लाख व स्वीडाद्र तका ग्वाहाली यागु जुल ।

नगरपालिकां नगरबासीपिनिगु स्वास्थ्यता बिचः याडः मदिकक वडा-वडाय् मचाछें जाँच (प्याप स्मेयर) नपां दुरुप्वया क्यान्सर, न्हाय, न्हयप व घाँटी, हाडजोनीं (क्वें), नशा रोग व मिखा जाँचया निःशुल्क शिविरत चायकः वगु दः ।

सम्पदा ल्यंकः स्वाकः भिंकः तय्गुः

सम्पदा ल्यंकः, स्वाकः व भिंकः तय्गुलि खप नगरपालिकां हदाय तयो ज्या साडः वगु दः । चालु आ.ब. या हिलाखय् मठ छ्वा, देगः ल्हवनय-कानय् प्यंगः, फल्चा प्यंगु, द्योछें ल्हवनयगु व दानयगु स्वखा, पुखु छगः, तुंथि छगः, ल्वहँहिती ल्हवनयगु छपु व मेमेगु निर्माणयाडः हिंखुगु सम्पदा ल्हवनय-कानय् व दानयगु ज्या क्वचालसा उकियालागिं ४ करोड ८५ लाख व ३३ हजार खर्च जुल । अथेहे ल्वहँहिती छपु, मथ छ्वा, देगः ल्हवनयगु स्वंगः, फल्चा गूगु, द्योछें ल्हवनयकानय् व दानय् नेखा, पुखु डागः व मेगू नेगू निर्माण याडः २३ गू सम्पदात ल्हवनय-कानय् व दानयगु इवलय् दः । थथे याडः दाडः च्वंगु व सिधःगु याडः मुक्कं ३९ गू सम्पदाया मुक्कं खर्च ५ करोड ६१ लाख ९७ हजार खर्च जुल ।

पुलांगु नगरलागा दुनय निजी छँ व सम्पदा ल्हवनय-कानय्ता चांकाक दयकेगुता बः याडः वयागु दः । लोकं हवागु थन्थु दरबार, खप नगरपालिका ९ दतात्रय च्वंगु पुजारी मठ, खप नगरपालिका ६ वडाया छुम गणेद्योया द्यो छँ नपांया सम्पदात चांकाकः दाडः च्वडा । छुमः गणेद्योया द्यो छँ दानय्धुगु जुलसा इखालाछी मथ, हाडाछें नपांया सम्पदात थुगुसी दानय् धुंकय्गु काथं ज्या जुयो च्वंगु दः ।

सापारुबलय क्यनिगु थी थी सांस्कृतिक विद्यातय्ता धिंधिबल्लाखय् ल्यज्या याडः सिरपा बियो वयागु दः । त्वालय-त्वालय ज्या साडः च्वंपुं सांस्कृतिक गुरुपिन्ता हानय्गु नीति काथं चालु आ.व.सं २२ म्हा गुरुपिन्ता हाडागु जुल ।

२०८२ बैशाख १२ व १३ गते खप नगरपालिका व पुरातत्व विभागया मंकः कुतलय २०७२ सालया तः भवखाचा लिपा ल्हवनय कानय्या छगू दशकया लिफः स्वयगु ज्या इवः व अन्तरराष्ट्रिय वैज्ञानिक समिति (स्वनिगः विश्व सम्पदा लागा) या बैठक खपय जूगु जुल ।

पर्यटन

चालु आ.ब. या हिला दुनयँ गैर सार्कपाखय् १ लाख १८ हजार ७५४ म्हा अलय सार्क व चिनियाँत ९३ हजार ३२१ म्हा याडः मुक्कं २ लाख १२ हजार व न्हयडाम्हा पर्यटकपिसं

सच्छि व ड्यव्यागूगु स्वप पौ, ब.च्छि पौ(पाक्षिक)

खप दे चाहिलय धुंकल । वांगु आ.व. या श्रावण निसे वैशाखतक हिलाखय् गैर सार्क पाखय् १ लाख ७ हजार १३१ म्हा व सार्क चिनियाँपाखय् १ लाख ३ हजार २१ म्हा याडः मुक्कं २ लाख १० हजार १५२ म्हा पर्यटकपिसं खप दे चाहयूगु खः । वांगु दायँ स्वयो वहे इलय स्वयो १,९२३ म्हा अपः पर्यटकपुं वगु जुल ।

२०८१ मंसिर २८ गते निसँ पुस २ गते तक 'खप महोत्सव' जुल । थी थी ३२ गू विधात पिबवःगु उगु महोत्सवखय् दुनय व पिनय याडः लाखौ पर्यटकपिसं स्वगु जुल ।

२०८१ माघ ५ गते नेपाल भ्रमण वर्ष २०२५ घोषणा व चिनियाँ हुँदै २०२५ या शुभारम्भ ज्या इवः खपय तःजिक क्वचाल । थुगुसी चिनियाँ पर्यटकपुं अपलं द्रहँ, वैगु आशा याडा ।

कासा

खप नगर व्यागु ब्वनय्कुथि ब्यागु कासाया धिं धिं बल्ला २०८१ जुय धुंकल । नगरपालिकां फुटबल, भलिबल, जिम्नास्टिक, बक्सिड, कराँते व छ्यँ बलया मदिकक स्यनय्गु याडः च्वंगु दः । नपां पूर्णकालीन कासा स्यनामिपुं व्यवस्था याडः नगरदुनयया ब्वनय्कुथि मदिकक कासा स्यनय्गु व त्वालय-त्वालय शारीरिक व्यायाम प्रशिक्षण नं याडः वगु दः ।

खप नगरपालिकाया ग्वसालय २०८१ चैत्र २३ गते निसँ २५ गते तक स्वन्ह्या अन्तरनगर जिम्नास्टिकया धिं धिं बल्ला क्वचाल । थुगुसी राष्ट्रपति रनिड्गु शिल्डया धिं धिं बल्ला नं याडागु जुल । उगु कासाया धिं धिं बल्ला खय् खप नगरपालिका न्हाप लागु खः । खप नगर दुनयया संस्थागत व सामुदायिक ब्वनय्कुथिया शिक्षक-शिक्षिकापिन्ता आधारभूत प्रशिक्षण बियो वयागु दः ।

नगरपालिकाया ग्वसालय २०८१ कार्तिक ९ गते निसँ १५ गते तक खप नगर ब्यागु ब्वनय्कुथि ब्यागु छ्यँवल, भलिबल, भतिंगबारा, कबड्डी, खोखो, एथलेटिक्स, बुद्धिचाल, ब्याडमिन्टन, कराँते, उसु, तेक्वान्डो, पोर्टबल, जिम्नाष्टिक, कसिमला पायँ व प्यकुं घुँया धिंधिं बल्ला कासा क्वचाल ।

खप नगरपालिकां त्वालय-त्वालय खुला व्यायामशालात व्यवस्थायाड वयागु दः । थी थी राष्ट्रिय अन्तराष्ट्रिय कासाखय पदक त्याकपुं कासामिपिनिगु मन च्वजाय्केता थुगुसी २०८२ जेठ १५ गते कासामि हानय्गु ज्या जुइगु दः ।

लकस व सुपुकुचु :

नगरया महत्वं जःगु सम्पदास्थल, खुल्ला लागा खुसी,पुखुथजगु सार्वजनिक स्थलय नगरपालिकाया जनप्रतिनिधिपुं कर्मचारी व स्थानीय जनतात मिलय जुयो लच्छिया नेकः १ गते व १५ गते सुचुकुचु ज्या इवः न्ह्याकः वयो च्वंगु दः । छँ छँ नं

प्याहाँ वैगु फोहरत ध्वगिइगु व ध्वमगिइगु फोहर छख्य लिइके बियो बिस्कं बिस्कं मुडः तय्ता बाल्टिन इडः बियागु नपां छँ छँ फोहर मुडः ह्यता ट्राइसाइकलया व्यवस्था यागु दः ।

कृषि:

कृषि चुन ५० प्रतिशत (बचिछ) अनुदानय अलग नगरपालिकापाखं पिकःगु २० के.जि.या छबोरा कम्पोष्ट सः दांकः मियो वयागु दः । किसानतय्सं ह्वयकगु तरकारी अःपुकः मियता खवप नगरपालिका वडा नं ५ पसिख्यलय तरकारी बजारया व्यवस्था व कृषि उत्पादन भण्डारणयाय्ता खवप नगरपालिका ८ वडाया लिबाली चिस्यान केन्द्र दयकः चवंगु दः । किसान सूचीकरण ज्याइवः पाखं अःतक खय् ४,२२५ म्हा कृषक घरधुरी किसान सूचिकरण प्रणालीसं नांधल खय् जायकगु खः ।

चालु आ.व. खय् २,७६६ म्हा खिचातयता रेबिज खोप, खिचाता बन्ध्याकरण ५१३ म्हा, छँ लहिडः तःपुं व गल्ली खिचातय्ता रेबिज खोप १,३१४ व मेपू पशुपन्थीतय्ता उपचार सेवा ब्यगु दः ।

ल्यासे ल्याम्होपुं व थःगु तुतिस्वय दानय फय्केगु:

स्थानीय ल्यासे ल्याम्होपिन्ता लाहातय ज्या दैगु सीप स्यनयगु ज्या इवः काथं सुज्या सुयगु मेसिन ल्हवनयगु, ग्याँस भूथु ल्हवनयगु, साँ च्याकयगु तालिम, आधाभूत व एडभान्स ज्वरय यायगु, आधारभूत व एडभान्स सुज्या सुयगु तालिमय थुगु आ.व. खय् ५१६ म्हा स्वयो अपलं नागरिकपिसं तालिम काय धुंकल ।

भाय स्यनयगु तालिम नं मदिक स्यडः जापानी भाय व चिनियाँ भाय स्यनयगु याडः चवंगुलि चालु वर्षय् मुक्कं १७ म्हा व्वनामिपिसं जापानी भाय व ३० म्हा सिनं चिनिया भाय सय्कः चवंगु दः ।

खवप नगरपालिकां ल्यासे ल्याम्होपिन्ता लाहातय ज्या, दयके वियता डागूलाख तका तक युवा उद्यमशीलता ऋण बियगु याडः वगु दः । गरिबी निवारणया लघु उद्यम विकास कार्यक्रम पाखं न्ह्याकगु बेकरी, मखमली लंका सुयगु व पेपर रिसाइक्लिड तालिम ब्यगु दः ।

लघुउद्यम विकास कार्यक्रम पाखं नगर दुनयया हिगूतुं वडाया ज्या मदयक चवंगु ल्यासे ल्याम्होपिन्ता ११ दिने उद्यमशीलता विकास तालिम क्वचाल सा आधारभूत छँगु लकां सुयगु, ब्याग, भोला दय्केगु मोबाइल ल्हवनयगु व मोटरसाइकल ल्हवनयगु सीप विकास तालिम न्ह्याकः चवंगु दः । नपां लघु उद्यमितय्गु स्तरोन्नतिया लागिं एडभान्स बेकरी, मखमली लकां, सिँकःमि (काष्ठकला) या सीप विकास तालिम बियो चवंगु दः ।

सच्छि व डय्च्यागूगु स्वप पौ, बःछि पौ(पाक्षिक)

सहकारी :

सहकारी सञ्चालकपुं जनताया मुडः तःगु बचतया धेबा, ज्वडः बिसे वानिपुं यक्व खानय् दयो वसेलिं नगर दुनयया सहकारीसं अजगु समस्या मवयमः धाय्गु मतिं इलय् ब्यलय् सूचं बियो मुंकः सचेत याडः चवंगु दः । समस्या जुइगु खानय दःसा सहकारीवाडः स्वयो ल्हवनयगु कुतः याडः चवडा गुलि नं सहकारीया सञ्चालकपिनिगु सम्पत्ति रोक्का याडः जनताया वचत लिता बिइकेगु फक्व कुतः याडः चवडागु दः ।

देको मिबा ईटापाके आवास योजना

खवप नगरपालिकापाखं न्ह्याकः चवंगु देको मिबा इटापाके जग्गा एकीकरण आयोजना १६५४ पी जग्गाय् न्ह्याक चवंगु खः । मुक्कं कित्तासंख्या २५०२ मध्ये अः तक खय् १०४३ गू पूर्जा इडः बिय धुंकगु दः । आयोजनासं पूर्वाधारत दयकेगु ज्या नं जुयो चवंगु दः । खुसी सिथय्या लाँ नपां मूमू लाँत पीच याय्गु ज्या क्वचाइन । बुँथुवः पिनिगु नेगूप्यंगू गुनासोत न्यडः ज्यंकय्गु कुतः जुयो चवंगु दः । गुठी जग्गा व खुसीया मापदण्डया समस्या ज्यंकय्ता कुतः जुयो चवंगु दः ।

विकास निर्माण:

खवप नगरपालिका वडा नं ६ देकोचाय् नगरया गौरबया योजना अरनिको सभा भवन या नेकगू चरणया ज्या जुयो चवंगू दःसा खवप नगरपालिका वडा नं ७ खँचाय् स्वास्थ्य चौकी दयकः चवंगु, खवप टेलिभिजन स्टुडियो दानय्गु ज्या नपां फोहर मैला प्रशोधन केन्द्र दानय्गु ज्या जुयो चवंगु दः ।

३ करोड २३ लाख तका बजेट छख्य लिइकः शित भण्डारण गृह भवन निर्माण रु. ८० लाख बजेटय्, बाराही ताँ लिक्क एप्रोच रोड नपां रिटेलिङ्ग वाल दयकेगु व ५० लाख बजेटय् खवप नगरपालिका पुलांगु जगातीताँ दय्केगु ज्या जुयो चवंगु दः ।

नगरस्तरीय हिंन्यगू योजनाया कुल १२५६ मि. ल्वहँत सियगु व खवप नगरपालिका वडा नं २ या देकोमिबा इटापाके जग्गा एकीकरण आयोजनाय् ४ कि.मि. पीच याय् धुंकल । खवप नगरपालिकाया तारा लाँ, लिबाली, कमलविनायक देकोचा व चम्पकेश्वर याडः थयं मथयं २ कि.मि. लाँ पीच जुयो चवंगु दः ।

वडास्तरीय योजनाया लागिं मुक्कं ६ करोड तका दां छख्य लिइकगुलि अः तकखय् ३ करोड २० लाख खर्च जुय धुंकल ।

बजार अनुगमन :

उपभोक्तापिनिगु हक अधिकारता सुनिश्चितता बियता खाद्य व उपभोग्य सामग्रीत विक्रिवितरणता बांलाक याकय्ता

खवप नगरपालिका मदिक्क बजार अनुगमन याडः वगु दः । जनताया स्वास्थ्यनपां तप्यंक स्वापुतैगु वासःपसः, लापस, चाकुमारीपसः, किराना पसतः थजगु थीथी व्यापार व्यवसायता मदिक्क अनुगमन याडः वगु दः । अनुगमनया इलय लुयोवगु म्याद फुगु व धवगिगु वस्तुत धूयाडः, मापदण्ड पूमवांकपुं व्यवसायपिन्ता कानुन काथं कार्वाही याडागु दः । अथेहे नगरया विकास निर्माणया ज्या नं मदिक्क अनुगमन याडागु दः ।

नवसापास :

आ.व. २०८१/८२ या हिलाखय् मुक्कं ४१९ गू नक्सा दर्ताजगुली उगु इलय ३८३ गू नक्सापास जुल । उलि मध्ये ११३ म्हासिं निर्माण सम्पन्नया दसि पौ नपां काय धुंकल ।

मुद्दा फछ्यौट

आ.व. २०८१/८२ या हिला दुनयँ अनियमित निर्माण नपांया विषयया ४३२ गू मुद्दाया फछ्यौट (निपं) जुल । उगु इलय नगरपालिकाय् मुक्कं ३७७ गु मुद्दा दर्ता जगु खः ।

साफूकुथि

खवप नगरपालिकापाखं चाय्क तःगु जनज्योति साफू कुथिसं मुक्कं १५९७ म्हा दुजःपुं दः । देया थी थी तह्या जनप्रतिनिधिपुं नपां थीथी लागानपां स्वापु दःपुं च्वमिपुं व अनुसन्धानकर्तात साफू कुथिसं सेवा काय्ता व । नपां साफूकुथिया खौं सिइकेता सामुदायिक व संस्थागत ब्वनयकुथिया शिक्षकपुं, ब्वनामिपुं नं आनावयो स्वः वय्गु या । थुगुसी साफूकुथि छ्यलिपुं व ब्वनिपुं १८,१७९ म्हा थ्यंगु जुल । साफूकुथि ई-लाइब्रेरी छ्यलिपुं नं छसिकाथं तःम्हा दयो वगु जुल ।

सञ्चार माध्यम

नगरपालिकाया फुक्क ज्या इवः त व निपंत लयपौ 'भक्तपुर', बःछिपौ 'खवप पौ' भक्तपुर खबर डटकम (अनलाइन) पौ, फेसबुक पेज, वेबसाइट पाखं पिब्वयो वयागु दः । थुगुसी खवप महोत्सव स्मारिका, किपा साफू (Pictorial Book), सहकारी आवाज, खेलकुद स्मारिका व 'लक्ष्मी नरसिंह मन्दिर पुनः निर्माण २०८२' याडः डागू साफू पिथानय् धुंगु दः ।

त्वनयगु नाः

नगरवासीपिनिगु छँ छँ थ्यंकयगु ज्या जिमिसं मदिक्क न्ह्याकः च्वडागु दः । मेलम्चीया नाः वयानिं नगरवासीपिसं छुं भाति राहत मति तःगु दः । सकल नगरवासीपिन्ता अःपूक नाः इडः बियता नाः छँ या थी थी थाय् ल्यंकः भिंक तय्ता जिमिसं बःयाड च्वडा ।

विविधः

२०८१ असोज १ गते भूमि व्यवस्था सहकारी व गरिबी निवारण मन्त्री माननीय बलराम अधिकारी व २०८१ असोज

सच्छि व ड्यव्यागुगु स्वप पौ, बःछि पौ(पाक्षिक)

- ६ गते प्रतिनिधिसभा दुनयया शिक्षा, स्वास्थ्य तथा सूचना प्रविधि समितिया सभापति माननीय अम्मर बहादुर थापाया न्ह्यलुवाय् वपुं प्रतिनिधिमण्डलं खवप नगरपालिका वडा नं १ य् च्वंगु १०८ पी जग्गा व नगरपालिकापाखं चाय्कः तःगु शैक्षिक संस्थात व खवप अस्पतालय् भायो स्वयो दिल ।
- २०८१ पुस १६ गते शिक्षा, विज्ञान व प्रविधिमन्त्री विद्या भट्टराई जुं खवप नगरपालिका पाखं न्ह्याकः तःगु शैक्षिक संस्था व खवप अस्पतालय् भायो स्वयो दील ।
- थुगु स्वदाया इलय चितवन जिल्ला राप्ती नगरपालिकाया प्रमुख शम्शेर लामा, मेलम्ची नगरपालिकाया उपप्रमुख उमा प्रधान, गोरखा जिल्लाया भीमसेन थापा गाउँपालिका अध्यक्ष लोकप्रसाद बन्जारा नपां ९० गू स्वयो अपः स्थानीय तहया प्रमुख, उपप्रमुख व जनप्रतिनिधि व थीथी स्थानीय तहया प्रमुख प्रशासकीय अधिकृत व कर्मचारी पिनिपुं प्रतिनिधि मण्डलं खवप नगरपालिकाया अध्ययन अवलोकन यागु रेकर्ड दः ।
- नपां चिनियाँ जनप्रतिनिधि सभाया उपाध्यक्ष सियाओ चिए, चिनियाँ राष्ट्रिय जनजाति मामिला आयोगया माननीय मन्त्री फान यूए, क्यूबाया कार्यवाहक राजदूत अबेल अबाले डिस्पेन्च, जापानया गुनमा प्रान्तया ओइजुमी नगरया नगरप्रमुख मुरायामा तोसिआकीपुं नपां थी थी देशया उच्च पदस्थ पदाधिकारीपिसं नं खवपया ऐतिहासिक नपां सांस्कृतिक सम्पदातय्गु अवलोकन भ्रमण याडः द्यगु खः ।
- फुक्क वडातपाखं स्थानीय गरिब, असहाय व विपन्न नागरिक पिन्ता निःशुल्क विद्युतीय भुथु (Induction) इडः बिल ।
- २०८१ मंसिर १८ गते ३३ औं अन्तर राष्ट्रिय अपाङ्गता दिवसया लसताय अपाङ्गता जूपुं मन्तय्ता मःकाथं अपाङ्गता सहायक सामग्री इडः बिला । समितिं खवप अस्पतालता अपाङ्गता जूपिन्ता फिजियोथेरापी मेसिन, पूर्ण अपाङ्गता, जूपिन्ता नं थर्मस व सर्वोत्तम पिठो इडः बिल ।
- २०८१ फागुन १ गते निसं खवप नगरपालिकापाखं 'राष्ट्रिय परिचय पत्र' इडः बियो च्वंगु दः ।
- खवप नगर दुनयया मां ब्वा नेम्हां मरुपुं मचातय्ता लच्छिया नेद्वतका दां बियो वयागु दः ।
- दकलय लिपा, आ.व. २०८२/८३ या लागि न्हूँ न्हूंगु योजनात दय्केगु ज्या जुयो च्वंगु दः । न्हपाथें थुगुसिनं छिकपिसं नगर व नगरवासी पिनिगु भिं याय्गुलि अमूल्य सुभावात बियो जनप्रतिनिधिपिन्ता ग्वाहाली याडः दियता दुनुगलं निसं इनाप याय् ।

हिल्याः २०८२/२/६

सुनिल प्रजापति, प्रमुख खवप नगरपालिका

लक्ष्मी नरसिंह देगः दानय धुंकः पर्यटन विकासय ग्वाहाली जुइगु

नगर प्रमुख प्रजापति

नेपः या संविधान जारी जुयधुंकः खप नगरपालिकाय् नेकगु कार्यकालया निंतिं त्याकः वयागु नं स्वदा फूत । वि.सं. २०७९ साल जेठ ६ गते खुन्हुँ जिमिसं शपथ ग्रहण याडागु खः । निर्वाचनया इलय जनताया दथ्वी पार्टी घोषणा पत्र काथं याडागु बाचा काथं जिमिसं ज्या याडः वया । श्व स्वदाया दुनय् मेमेगु ज्या नपां मुज्या न्हांगु दायँ खप अस्पताल उलय ज्या, नेकगु दायँ ऐतिहासिक भाज्या पुखु उलेज्या व स्वंगूगु दायँ थौ श्व लक्ष्मी नरसिंह देगः उलेज्या याडः चवडा ।

खप दे कला व संस्कृति जःगु पुलांगु नगर खः । थाना ऐतिहासिक, सांस्कृतिक व पुरातात्विक महत्वंजःगु यक्व यक्व मूर्त व अमूर्त सम्पदात दः । ई नपां यक्व यक्व सम्पदात मदयो वानसा गुलिं तानयूता चवडः चवना । खपय दःगु छगू छगू सम्पदात देया सम्पतिकाथं कायो खप नगरपालिकां मः काथंया अध्ययन अनुसन्धान याडः भीगु थःगु हे मौलिक पहलय् ल्हवनय-कानय व दानयगु ज्या याडः वयागु दः । उकि मध्ये छगू खः लक्ष्मी नरसिंह देगः ।

भीगु थःगु पह ताडः वान धःसा सम्पदाया महत्वं ताडः वानिगु खायँ जिपुं तस्कं सचेत जुया । लक्ष्मी नरसिंह देगः दानयगु ज्या सुरु याय हौं उकिया पुलांगु पहः गथे च्वं दक अपलं हिल-माल, न्यडः स्वया । स्थानीय जनता, इतिहासविदपुं प्राविधिक पिनिगु खोज अनुसन्धान अः दानय धुंकागु काथंया नेता प्वहँ नपांया देगः धायगु खौं क्वःछित अलय उकिया लिधंसाय हे खप नगरपालिकां नक्सा व लागत इस्टिमेट स्वीकृत याडः दानयगु ज्या हज्याकागु खः ।

इलय हे थुगु देगः दानय धुंकागु तातुडः नगर प्रमुखया कजिलय लक्ष्मी नरसिंह मन्दिर पुनःनिर्माण निर्देशक समिति, ई. सुजन माकया कजिलय प्राविधिक समिति, उब्लेया वडा नं ४ या वडाध्यक्ष कुमार चवालया कजिलय अनुगमन समिति अलय स्थानीय न्हुच्छेराम भेलय्या कजिलय उपभोक्ता समिति दयकः देगः दानयगु ज्या हज्याकल । नेपाल मजदुर किसान पार्टीया हानय् बहम्हा नायो भाजु नारायण मान बिजुकछें (रोहित) जु पाखं वि.सं. २०७८ मंसिर २७ गते थुगु देगः निः स्वानयगु ज्या जुल । थौ स्वदात्या लिपा वयकपाखं हे थुगु देगःया उलेज्या याकय् दयो जिपुं तस्कं लयताया ।

देगः दानयगु ज्या नपां जिमिसं थःपिसं दुनुगलं निसं ग्वाहाली यायगु मति दःपुं महानुभावपुं नपां आर्थिक, भौतिक व श्रमदान यायता इनाप याडा । वनलिं नीन्धगू लाख व सुइखुद्व स्वयो अपः धेबा न्हयसत्याम्हा स्वयो अप जनताया ज्याखं श्रमदान व लाखौं तका क्वतिया जिन्सी सामानया ग्वाहाली काथं ब्यूगु जुल । जनताया साथ व ग्वाहाली दःसा भीगु सम्पदात पुलांगु भीगु मौलिक पहलं हे दानयूता थौ या पुस्तां नं फः धायगु छगू दसु लक्ष्मी नरसिंह देगः दाडागु नं खः ।

सम्पदा ल्हवनय-कानय व दानयगु ठेक्कां बियमज्यू धायगु खौं जिमिसं मदिक सः तयो वयो चवडा । भीगु पहः ल्यंकः म्वाकः तयगु, स्थानीय सीप, स्रोत व साधनत अपलं छ्यलः भिंकः बांलाकः दयेकगु व दाडागु संरचनाखय् स्थानीय जनताया थःगु धायगु भावना ब्वलांकयगु तातुडः उपभोक्ता समितिपाखं जिमिसं सम्पदा ल्यंकः म्वाकः भिंकः तयगु ज्या याडः वया ।

छुं नं विदेशीया ग्वाहाली मकःसिं खप नगरपालिका व स्थानीय जनताया ग्वाहाली थुगु देगः दानय फयागुलि जिमिता गर्व जुगु दः । थजगु ग्वाहालीया भावना न्ह्याब्लें ल्यंकः म्वाक तयमः नपां न्हूगु पुस्ताता श्व महत्वं जःगु शिक्षा नं जुई ।

देगः दानयगु नपां स्वापु दःपुं फुक्क खौं दुथ्याक साफू काथं पिकायगु कुतः नं याडा । थुगु साफू इतिहास व संस्कृतिया ब्वनामिपुं व ऐतिहासिक सम्पदामध्ये अध्ययन अनुसन्धान याइपिन्ता तस्कं ग्वाहाली जुइगु जिमिता विश्वास दः ।

थुगु देगः दानयगु ज्या खं खपया महत्वपूर्ण सम्पदा लागतः माहीया स्वरूपय हिंसीया छपा अपा तांगु दः । थुकीं पर्यटन विकासय ग्वाहाली पक्का नं याई । थजगु सम्पदात ल्हवनय-कानय व दानयगु ज्या न्ह्याकतुं यंकयगु विश्वास नं जनताता बियो चवडा ।

देगः दानयगु इवल्य नेपाल मजदुर किसान पार्टीया नायोभाजु नारायण मान बिजुकछें जुं इलय-ब्यलय स्वःभायो ज्या साडः च्वपुं डकःमि, सिँकःमि, कालिगढ, जनप्रतिनिधिपिन्ता, ग्वाक दिल । वयकता खप नगरपालिकापाखं दुनुगलं निसं लयता प्वकसे सुभाय देछायो चवडा ।

नेमकिपाया छ्याञ्जे नपां प्रतिनिधि सभाया दुजःप्रेम सुवाल, वागमती प्रदेशसभाया दुजःपुं सुरेन्द्र राज गोसाइँ व सृजना सैजुं नं तःक हे भायो स्वयो दिसं ज्या साडः च्वपुं व जिपुं जनप्रतिनिधिपिन्ता मन ग्वाकः ब्यूगुलिं वयकपिन्ता नं सुभाय देछायो चवडा ।

अथेहे देगः दानयगुलि आर्थिक, भौतिक व श्रमदान याडः ग्वाहाली ब्यूपुं सकलें दाजु किजा- तता केहँ पुं, खप नगरपालिया जनप्रतिनिधिपुं निर्देशक समिति, प्राविधिक समिति, अनुगमन समिति व उपभोक्ता समिति चवडः ग्वाहाली याडः द्यूपुं सकलें दुज पासापुं, नपां इलय ब्यलय स्वःभायो सल्लाह व सुभाय बियोद्यूपुं महानुभावपुं नपां थुगु साफू पिकायता च्वसुत बियो ग्वाहाली याडः द्यूपुं सकल महानुभावपिन्ता खप नगरपालिकापाखं अपलं अपः सुभाय देछायो चवडा ।

(२०८२ जेठ ६ गते खप नगरपालिकाया ग्वसालय् जूगु खप नगरपालिका वडा नं. ४ गःहिति च्वंगु लक्ष्मी नरसिंह देगः उलेज्या ज्याइवः सं खप नगरपालिकाया प्रमुख सुनिल प्रजापतिं बियो द्यूपुं न्वचु या भाय हिला-सं.)

इतिहासया प्वाथय् लुकुंबियतांगु लक्ष्मी नरसिंह देगः पुनः जीवन काल



२०७९ वैशाख ३० गते जूगू स्थानीय सरकारया नेकगू निर्वाचनलिपा ख्वप नगरपालिकाय् जिपुं जनप्रतिनिधिपिसं बहाली याडागु स्वदा फुगु थौं खुन्हू जेष्ठ ६ गते खः । थौं जिमिसं नगरबासी पिनिगु हनय थुगु गःहिती त्वालय च्वंगु ऐतिहासिक लक्ष्मीनगरसिंह देगः उलेज्याखय् च्वडः च्वडा । थुगु देगः देशया गौरबशाली इतिहासता हकनं म्वाकः हयो छिकपिनि हःनय् ब्वय दयो जिपुं तस्कं लयताया नपां जिमिता आत्मसन्तोष महशुस जुयो च्वंगु दः । थौं या श्व गरिमामय ज्या इवः सं सकल नगरबासी दाजु-किजा तता केहेपिन्ता लसकुस नपां लसहानय् ।

ख्वप नगरपालिकां 'पुर्खा दय्क तःकगु सम्पति भीगु कला व संस्कृति' या नारा ज्वलाकसें थौं इतिहासया गर्भय् तुसुडः

वानयतांगु लक्ष्मी नरसिंह देगः थानाया जिम्मेवार वडावासी दाजुकिजा, तताकेहेपिनिगु सम्पदाप्रतिया, च्वजःगु मायां ईकाथं परिस्थितिया सामञ्जस्यता थुगु देगः भीगु हनय कपः धस्वाकः दाडः च्वंगु जुल । थुगु ज्यां ख्वप नगरपालिका व नगरबासी पिनिगु म्हासिइका सं मेगु बांलागु पहः ताडः ब्यूगु मति वांगु दः ।

१५ गू शदीं सं जुजु जयस्थिति मल्लया पालाय् दांगु थुगु देगः १८ गू शदिसं जुजु जितामित्र मल्लया पालाय् तः भवखाचां थुडः ब्युसेलिं छुं भाति ल्हवडः भिंकः पाताल गणोद्योया देगः दांगु इतिहास पाखं थुइके फः । ९० साल हौं हे दुगु थुगु देगः ९० सालया तः भवखाचां फःतकया संरचना तक थुडः ब्यूगु इतिहासकार पिनिगु धापू दः । बेलायती महारानी एलिजाबेथया भक्तपुर भ्रमणया इलय थुगु देगः छता जक जायकः जस्ता पोल्हें चिडः सुरक्षित यागु खानय् दः । मः क्वः ऐतिहासिक दसि प्रमाण मलुसेलिं थी थी इलय् थुगु देगः दानय्गु कुतः धःसा मजगू मखु ।

त्याकः वापुं जनप्रतिनिधिपुं नेपाल मजदुर किसान पार्टीया घोषणा-पत्रकाथं शिक्षा, स्वास्थ्य, सुचुकुचु थजगु मदय्क मगागु आधारभूत आवश्यकता पूर्वाकय्ता

उपप्रमुख- रजनी जोशी

अलय् भीगु म्हासिइका दःगु सम्पदा नपां संस्कृति ल्यकः म्वाकः तयगुलि मदिवक ज्या न्ह्याकः च्वंगु दः । सम्पदा-संस्कृति ल्यकः म्वाकः, भिंकः तयगुलि ख्वप नगरपालिकां स्थानीय उपभोक्ता समितिपाखं स्थानीय कालीगढपिसं हे स्थानीय दानयगु हलज्वलं छ्यलः भीगु थःगु हे पहलं थुगु देगः थापाच्च धिसिलाक दानय् धुंकगु खः । श्व ख्वप नगरया छगू तः हांगु उपलब्धी खः । थुकी सकल नेपःमि पिन्ता स्वनिगःया मौलिक पहः ल्यकः म्वाकः भिंकः तय्फः धाय्गु विश्वास अप्वयो वगु दः । उकिं थुगु भब्य देगः या सांस्कृतिक महत्व ल्यकः म्वाकः तय्ता थौं हे श्वहे वडाया वडावासीपिनिपाखं ब्वछाय्गु, विशेष क्षमापुजा याय् तांगुलिं थुगु देगः व थुगु थाय् म्वाडः च्वनिगु व म्वाडः च्वंगु ख्वप देशया विशेषता अझ च्वजाइगु जिमिसं विश्वास याडा ।

(ख्वप नगरपालिकया ग्वसालय २०८२ जेठ ६ गते जूगू ख्वप नगरपालिका वडा नं ४ गःहिती च्वंगु लक्ष्मीनरसिंह देगः उलेज्या सं ख्वप नगरपालिकाया उप-प्रमुख रजनी जोशीं बियो द्यूगु न्वचुया भाय हिला-सं.)



जेठ महिनाया लकस

आशा कुमार चिकंबजार



फागुनया सिरिसिरी फसं छुं भाति पुइकः यंकगु चिकुला चैतया लिभःलं गांकः बियवं धर्तीया चा गनां गाडः चिरिबायो मि हवः दयो वै । गनां सीतामाता धर्ती क्वळाडः वां थें मनूत नं अथे हे कुतौ वानिगूला धाय्गु मनय् जूसां मनय वगु धाकु फय नपां त्वाय चिडः चैतया हुरी धायो वैगु धाकुफसं जस्ता पोल्हें दःसा पुईकेता जुई । सुकुप्वल्हें दःबलय नं स्यंकयता स्वै । अलय अपा प्वल्ह मुसुकःसां देगलय यखायो तःगु फयगांया कालांकुलसलं छुं प्रलय हे वडगुला धाय्गु हसना ब्यूगु थें तायकी । वहे इवलय छसिकाथं ताल्लाया दसिपौ ज्वडः गर्मीया डिग्री पासयाडः वम्हा सुज द्योया फूर्ति जेठ्या फूर्ति युनिभर्सिटी दीक्षान्तया दसिपौ ज्वड वम्हा स्वयो अपः फूर्ती क्यडः थौ स्वयो कन्हे भनः भन तःनुकः है । अलय वयागु फूर्ति पानयता वैगु सर्गया सुपायें, व-फय् नं संघर्षया तः चवगु पला न्ह्याकः तः तः सलं नारा श्वयकथें सः पिकायो धर्ती बर्षय जुई ।

जेठ बलय लिभः मत्वसा गथे छ्व सयकः पाय् फै ? अलय लयागु छ्व लाहातं दायता नं छ्वसिमा फालाहां च्वंकः तचवगु लिभालय पाड, छागु ल्वहंतयदायो छ्वसिमा व छ्व छखय् लिइकी । अजनं अत्तेरी धेचात धेकय् जुयो ल्यडः च्वनि । मानौ


अपुं घाँसय् सुचुक च्वंपुं वम्हा सर्प थें ल्यतु ल्ययो छ्वधेचा दायो पिमकासं मगा, क्रान्ति लिपा सुचुक च्वंपुं वर्गशत्रुता थें । अमिता खगः, हिजाम्वगः, कछी, छुकिं छुकिं दाय मःगु खः । वा छ्व धेचा धिरिधिरि याडः जूसां थप बः पिमकःसिं मगा । म्हेगया इलय ।

छ्वलयो छ्वल्हें जक खानय् दःसा उराठ लकसय् नं छताजिया स्वं ह्वई, यलामुखु स्वं । वाउँसे च्वंगु स्वंमाखय् तुइसे च्वंकः, नासा हवल ह्वडगु यलामुखु स्वंया चुपाखय् धःसा भातिचा म्हवसुई । अल्य श्व स्वं श्वयता उलि थाकु नं मजु । तुक्कुक्के त्वथुल श्वय अःपु । अलय गुम्हासिं सापलय छुयो, गुम्हासिं तपुलीं काकः कपालय छुयो वैगु थुगु स्वं आयुर्वेदिक वास काथं नं छ्यलय्गु या । अथेधाय् श्व स्वं नय्गु नं या । थुकिया महत्व वा श्वनयवं छुजुईलय् धाय्गु खायें तःम्हासिया तःताजि खाँ दःसां प्वा सुख मदैवल्य

नय्गु जक धाइपुं नं दः । दाच्छितक थुकिया स्वंम्हा वाउँसे च्वडः च्वंसां जेठ या इलय् ह्वडगु थुगु स्वं बुँपाज्या स्वं दक नं धाय्गु या ।

जेष्ठसं चमेली, च, स्वान जिल स्वां

बाह्मासे म्येँखय् न्हिथाडः तःथें थुगु इलय वसन्तया ल्यासे गालः वानय् धुंकसां ल्यासेया बाना छुडः ह्वयो च्वनिगु स्वं मध्ये चमेली स्वं, चः स्वं व जि स्वंया नं नां न्हिथाड, तःगु दः । अलय वैस त्वःतः वांम्हा मूस्वं नं सिति नखायादिगु पुजातक बःयाडः जूसां धस्वाय्गु कुतः याडः च्वनि । अलय वैस जायो वगु पा कःघाडः थी थी सिन्ह स्वं मू स्वं चतामारी स्वं लां थुकु स्वं मात मचापहः त्वःत ल्यासेचाया वाउँगु घंगाली सिडः ताल्ला नपां संघर्ष याडः थाहाँ वै । थी थी स्वं त गुलाफ, गांचा स्वं नं छस्वयो जिछुकम धायो ब्युटिपार्लर वाडः



वम्हा ल्यासे मय्जु थें पिलु वै मानौ व मिस नेवा: खय् ब्वति क: वानिम्हा (कन्टेस)थें न्यासी भ्वासी व लयतां जाय्क ।

सांगु स्वं नं थुगु महिनाया ल्यासे पहलं जायो वैम्हा मेगु छताजिया स्वं थें ख: । आयूर्वेदया इवल्य् दाँ वम्हा थुगु सांगु स्वं ध:सा प्वा स्यातकि वा प्वा सुख मतकिं नय्गु या । भातिचा चाकुसब: दैगु थुगु सांगु स्वंमाखय् तग्वजि मस:तलय् फूर्ति याड: च्वनि । अलय् बुलुहुँ ज्ञन्याया फाकं थें क्वदयो वानि ।

छ्वलय् ज्या धुं धुं छ्वसय्क छुस्या सियो घचाय् क्यल: चिनी (न्हपा साख) तयो सचुं (सतु) चा दय्क छ्वपय नवदुर्गाता न्वागी काथं छायो दाच्छितक नय्ता स्वथाड: तै । न्हपा छ्वबाली नं बुथुपिन्ता पुलयम:ध:सां २१ सालया नापी लिपा पुलय् म्वाय्कसा छ्व बाली ध:सा उलि च्वछायो त:गु खानय् मरु । अथेनं वाया बाली वयवं योमारीया न्वागी नगु व छ्वबाली द्रुहँ वलकी सतु(सचुं) दय्क म्हुछ्यामारी दय्क न्वागी नैगु किसानतय्गु परम्परा काथं न्हाड: वयो च्वंगु खानय् द: । सिथिनखातक दिगु पुजा याड: सितिं साति वापिज्या न्ह्याकिगु नं परम्परा द: । अलय् सितिनखा बलय् म्व: ल्हसा वर्षा फय फैगु धायो छँ सुचुकुचु याड: ना छँ तुंथि, ब्वड: ल्वहँहिंति नं सफा याइगु चलनं जेष्ठ धुंका वर्षा वैगुया सड्केत काथं मौशमया हसना नं धाय् फ: ।

गरिबया वर्षाया तरकारी फाकंचा नं थुगुइलय ह: जायो वै । अलय दसहरानिसें फाकं कताड: नय्गु याइगु काथं थुगुमहिना फाकं नैगु न्हपांगु महिना काथं नं काय् फ: । पञ्जारां बलय् सारां अलय् सकिमा पुन्ही बलय् सकी माड: नैगुलिं फाकं स्वनिगया स्थानीय तरकारी काथं काय्फ थुकिता दाच्छितकं तुं थी थी काथं, सकिचा ताड: डाचा धायो, चुल: मस्यौरा वा चुलाचा सकीमाड:, फाकं कताड:, फाकं ह: कटाड: गांक, पाड: स्वकंचा दय्क:,



नलिकियो पाड: सय्क गुन्चा दय्क दाच्छितकं भण्डारण काथं स्वथाड नैगु थुगु कें जेठ महिनाय् गनां पु छपु तयो अलय गनां मल्लाबाय् व पालुबाय् दश्वी दश्वी पिड तैगु चलन द: । अलय फाकं वु वलकिं अथेधाय फाकंमायें स्वं हवलकिं दसा मभिं धाईगु चलन ध:सा अजनं न्यनय द: नि । थुकाथं फाकंचा स्वथाड तयो मालिगु इलय् चिस्यान केन्द्र मरुबलय् सकीचा सुकु, गुन्चा स्वकंचा फाकं Cold Store (चिस्यान केन्द्र) मरुबलय सकीचा सुकु, गुन्चा स्वथाड तयो मालिगु इलय कें खुड: नैगु पुर्खाया ज्ञान अ:तक नं ज्या लगय जुयो च्वना तिनि ।

स्वं नलिया प्रतिक, क्यातुगु बस्तुया उपमा बियम:सा स्वंग्या उपमा नं तई । अलय स्वंथेंबिच: याड: तयाम्हा धाइगु चलनं स्वंमा पिसानिसें स्वं हवय मढ्यातलय बिच:याड, हव:गु स्वं स्वयो मन आनन्द याइगु प्राकृतिक चिकित्सा काथें कायो च्वंगु द: । थुगु इलय्या चमेली, जिस्वं नं मथ्वसें

अथें हायो वैगु काथं कायो त:सां नास्वाया धुकु काथं कायो त:गु द:। अलय धन्योचा स्वं ध:सा श्वहे इलय निसें हुर्कय् याड: स्वय हे हिंसी दय्क: यौवनया लुखां पिलु वैगु ई जेठ महिना काथं कायो त:गु द: । दीगु पुजा बलय् मू स्वं लिपामा नपां छाइगु चलनं थुगु स्वंमा नं स्वनिग: या रैथाने मखु धाय् मछिं । गुकिं थुगु स्वंमा ल्यंक: म्वाक: तय्म:गु खॉ पुर्खा धायो तकगु जुयम: । थुकिया पू सालय्गु, मा सालपियगु अलय चाया गुण नपां छु गथे याड: बिच: याय्म: धाय्गु खॉ न्हँगु पुस्ताकय् बिच: म्हुवँ जूजुं वांगुलि न्हँगु पुस्ताता थजगु ज्या ल: ल्हाड: तकय् म:गु खॉ भी न्हयलुवापिसं धायो च्वंसां थजगु खायें सुनं स्वयगु वा स्वइगु अ: तकनं क्व: छिड: स्वयो च्वंगु खानय् मरु । श्व स्वत: स्फूर्त वैसं ध्व पुल: वापुं बाज्या अजिपिसं सय्क नं मसय्कनं थ:गु इच्छां जक ज्या याड: वगु खानय् द: ।



प्रजातन्त्र किसि वल... वल ...

पूर्ण वैद्य

प्रजातन्त्र मत्ताहा किसी जुया:

दुब्बा: वयाचवनः,

मिखाय् पति तयातःपिनिगु हुलय्

तः दें निसेंया ख्वाँय्तय्गु बस्तिइ

व भखारी थें विशाल धाःसां खः

व थां थें धिसिलाः धाःसां खः

व हासा थें चकं धाःसां खः

वं भीगु दक्क बोभ ल्हवना बिइ धाःसां खः

वं प्रत्येक प्रजायात जुजु याना चाहिइकी धाःसां खः ।

मनूत दंग जुया:

वयात सप्रेम पचिपचि यानां चवन

मानौं, इमिसं थःगु त्याग व बलिदान मूल्यांकन याये थें ।

वयागु सिन्दूर जात्रा यायेत

थः थम्हं फयां फक्क छापियाचवन

थःथःगु भाग लिकया नं

वयात बांलाक्क लहिइगु बन्दोवस्त यानाचवन ।

तर, छपुचः किसि मागः त

वयात जिमिसं हयागु धकाः

वया गः पतय् गयाचवंपिसं

थः त जक छिंक लिधनाः चवनेत

अंकुश तया छु यात मस्यू

व मुल्याहा जुयाः दुब्बां वयाचवन

लयताया चवंपिं मनूतय्गु बस्तिइ

लाक्कसित न्हुत्तुहुयाः

भय, आतंक वाकाः

उकिं श्व वस्तिया मनूत

न्हयागु धाःसां खः धायेगु त्वःता

काचाकाचां मिखाय् पति लिकाकां

थःगु हे मिखा कनाः स्वयेगु कुतः यानाचवन

सकसियां समान सेवक धाःम्ह किसियात

सुनां गुकथं गयाः वयात

भय, आतंकया गः यानाचवन

मनूतय्गु अपाजिगु विश्वास स्यंकाचवन

इमिसं थुइका वयाचवन

य SS SI

मत्ताहा ला किसि थः हे मखु खनीसा

किसि गयाचवम्ह मागः धकाः जुयाचवन ।

(प्याकिं दः१४:१११२)

**खप नगरपालिकाता न्ह्याबलें सफा,
सुगधर तय्गु सकल नगरवासीतय्गु कर्तव्य खः ।**

खप नगरपालिकाया ज्या भवः त

नर्सिङ दिवशया लसताय् ज्या इवः

वैशाख ३० गते

खप नगरपालिकापाखं चाय्कः तःगु खप अस्पतालया ज्या साङः चवंपुं नर्सिपिनि दश्वी १६६ औं अन्तरराष्ट्रिय नर्सिङ दिवसया ज्या इवः सं न्वचु तयो दिसे खप नगरपालिकाया प्रमुख नपां व्यवस्थापन समितिया नायो भाजु सुनिल प्रजापति जु पाखं समाजता निरोगी याय्गु तातुङः खप नगरपालिकां खप अस्पताल चायकागु खाँ ब्याकसे खप अस्पताल अज बांलाक यंकय्ता अस्पताल व्यवस्थापन समिति हज्याङः चवंगु खाँ नपां चिकित्सक नर्स पिन्के स्वयमसेवाया भावना दयमःगु नपां थःगु पेशागत हकहित व व्यक्तित्व विकासया लागिं मदिकक ठवडः चवनय् मः धायोदिल । अजवलय ज्या सानिपुं कर्मचारी व नर्सिपिनिगु चख्यंगु तातुना ज्वडः थःगु ज्या हज्याकयमः धायो दिसे वयकलं २१ गु शदिंया चुनौति व समस्यानपां ल्वायफःपुं दक्ष जनशक्ति ठवलांकय् मःगु खाँ काङः दिल । नपां प्रमुख प्रजापति जुं स्वास्थ्य लागाय् जूगु व्यापारीकरणं गरिब जनतात स्वास्थ्य उपचार काय मखांगु दसु पिबवसे वयकलं स्वास्थ्य लागाय् व्यापारीकरण व निजीकरण याइगु हे स्वास्थ्य लगाय् तःहांगु पंगः खः धायोदिल ।

पञ्चायतया इलय थें शासक दलतय्सं कानून स्वयो चवय चवडः ज्या साङः वयो चवंगु खाँ ब्याकसे छुं न संस्था हज्याय्ता आना चवंपुं फुक्क कर्मचारीत छप्पा छधिजुयो हज्याय मःगु खाँ ब्याकसे संस्था भियाय्ता चिकित्सकपुं व नर्सपुं छप्पा छधि जुयो ज्या सानयमः धायोदिल । सन्तोष अध्ययनया शत्रु धायोदिसे न्हूँ न्हूँ विषय अध्ययन याय्गुलि लिपा लाकय् मज्य धायो दिल ।

खप नगरपालिका वडा नं ९ या वडाध्यक्ष नपां खप अस्पताल सञ्चालक समितिमा दुजः रबिन्द्र ज्याख्वं नर्सिपिनिगु विशेष दिन काथं दाय् दाय् पतिकं नर्सदिवस डाय्कः वयागु खाँ स्वासे सेवाया प्रतिमूर्ति फ्लोरेन्स नाइटिङ्गेल पाखं सय्कः नर्सपुं हज्याय् मः धायोदिल ।

वयकलं समाजय् स्वस्थ व निरोगीपुं दयकेगु मतिं

खप अस्पताल निःस्वांगु खाँ ब्याकसे शिक्षा व स्वास्थ्यखय् सरकारया नेपा खः दयकगुलिं जनाता दुःख जूगु खाँ काङः दिसे क्रिमिया युद्धखय् घःपः जू पिन्ता (घाइटेपिन्ता) उपचारय् नाइटिङ्गेल यागु सेवा स्वयो नर्स व चिकित्सकपिसं जनताया सेवाता हदाय चवडः याय्मः धायोदिल ।

ज्या इवः या सभाया नायोनपां खप अस्पतालया निमित्त मेडिकल सुपरिटेन्डेन्ट डा. मंजेश प्रताप मल्लं नर्सिङ दिवस नर्सपिन्ता हानय्गु दिन काथं डाय्कागु नपां थुगु पेशा सेवा,



करुणा, अनुशासनं जःगु पेशाखः धायोदिसे नर्सपुं न्ह्यागुं इलय हदाय चवडः ज्या सानय् मःपुं जुगुलिं अजपुं जनशक्तिता दक्ष व सक्षमपुं दयकेता ई काथंया तालिमत बियमःगु खाँ ब्याकसे वयकलं नर्स पिन्ता बांलापुं दयके फःसा जक भिंकः, बांलाक सेवा बिय फै धायोदिल ।

खप अस्पताल अन्तरंग विभागया इन्चार्ज रबिना कवां व छँ छँ नर्सिङया इन्चार्ज रबिना सुवालं नर्सिङ दिवस डाय्केमः गु या खाँ ब्याकसे फ्लोरेन्स नाइटिङ्गेलया बुदिंया लसताय हलिमय ब्याक दाय् दाय् पतिकं मे १२ खुन्हं नर्सिङ दिवस डायकः वयागु खाँ काङः दिल ।

नर्सिङ दिवसया लसताय प्रमुख प्रजापति जुं खप अस्पतालया ज्या साङः चवंपुं नर्सपिन्ता 'मतिनाया चिं' लः ल्हाङः ब्यूगु खःसा नर्सपिसं सांस्कृतिक ज्या इवःत पिबवगु खः ।

होटल, होमस्टे चाय्क च्वंपिन्ता आयुर्वेदवासया अभिमुखीकरण

वैशाख ३१ गते

आयुर्वेदिक अलय वैकल्पिक चिकित्सालय खपया ग्वसालय स्वास्थ पर्यटन प्रवर्द्धनया लागिं वागमती प्रदेश दुनयया होटल, होमस्टे चाय्क च्वंपिन्ता आयुर्वेदया अभिमुखीकरण ज्या इवः उलेज्या यासे खप नगरपालिकाया प्रमुख सुनिल प्रजापति जुं आयुर्वेद चिकित्सा मौलिक चिकित्सा पद्धति व चिकित्सा विज्ञानया मां काथं खः धायो दिसे मपूनिगु ल्वयया उपचारता थुगु उपचार पद्धति तस्कं ज्या लगय् जू धायोदिल ।



आयुर्वेद चिकित्सा पद्धति लिच्छवी कालयनिसें न्ह्याडः वगु अलय थुगु पद्धति अः तकनं उलि हे बांलागू खाँ काडः दिसे

अभिमुखीकरण

वैशाख ३० गते

वागमती प्रदेश सरकारया ग्वसालय खप नगरपालिकाया जनप्रतिनिधि नपां स्वापु दःपुं दुजःपिनि दश्वी क्वचःगु प्रतिकार्य समिति नपां द्रुत प्रतिकार्य पुचः या खायँ अभिमुखीकरण ज्या इवः जुल ।



वयकलं नेपः दे जडिबुटीया वास दयकेगुलि अपलं सम्भावना दःगु खःसां प्रचार-प्रसार व बजार मरुगुलिं वास दयकेगुलि म्हवचा जुजुं बांगु दः धायोदिल ।

खप नगरपालिकां वडास्तरीय नागरिक आरोग्य केन्द्र चाय्कः नागरिक पिन्ता निःशुल्क आयुर्वेदिक वासत बियो वगु खाँ ब्याकसे आयुर्वेद वासता सरकारं हदाय तयो थुकिता बांलाकः यंकयमः धायोदिसे सिंहदरबारया बैद्यखाना व नरदेवी अस्पताल चाय्कः व व्यवस्थापन याडः यंकयगूलि राज्यं ध्यान मव्यगुलिं तिडः छ्वय मालिगु अवस्था वगुलिं बैद्यखाना ल्यंकः म्वाकः तय्ता संघ, प्रदेश व स्थानीय सरकारं ग्यसुलागु ज्या यायमःगु खाँ ब्याकसे वयकलं आयुर्वेद चिकित्सा स्वास्थ पर्यटन प्रवर्द्धनया लिधंसा नं खः धायोदिसे पर्यटन व्यवसायीपिसं स्वस्थ खानपान व सुचुकुचुखय विशेष ध्यान तयमः धायोदिल ।

ज्या इवः सं खप नगरपालिका पर्यटक सूचना केन्द्रया प्रमुख गौतम प्रसाद लासिवं खपया पर्यटन च्वजायकेता खप नगरपालिकाया ज्यात उलः दिसे पर्यटन लागाय् आयुर्वेद चिकित्सा ज्या इवः, पाखं होटल व्यवसायीपिन्के बांलागु लिचवः, लाइगु विश्वास प्वकः दिल ।

ज्या इवःसं जिल्ला आयुर्वेद कार्यालय भक्तपुरया प्रमुख डा. नदन कँडेल जुं ज्याइवया खाँ काडः दिलसा आयुर्वेदन व चिकित्सा कार्यालयया मणिकण्ठ गौतमं लसकुल याडः द्यगु खः ।

समीक्षा गोष्ठी

वैशाख ३० गते

खप नगरपालिकाया प्रमुख सुनिल प्रजापतिया मू पाहाँलय 'नियमित खोप सृदृढीकरण, पूर्ण खोप सुनिश्चितता व दिगोपना' अलय सूक्ष्म योजना अद्यावधिक व सुचुकुचु बांलाकयगु ज्याया लिफः स्वयगु ज्या (समीक्षा गोष्ठी) क्वचाल ।



न्हूँपुं ब्वनामिपिन्ता लसकुस

जेठ १ गते

खप नगरपालिकापाखं चाय्कः तःगु खप इन्जिनियरिड कलेज व खप कलेज अफ इन्जिनियरिडया मंकः गवसालय 'भूकम्प इन्जिनियरिड व सहरी योजना व संरक्षण'या न्हूँपुं ब्वनामिपिन्ता लसकुस, अभिमुखीकरण व स्नातकोत्तर तगिंया च्वजःपुं ब्वनामिपिन्ता हनापौ लःल्हाय्गु ज्या इवःया मू पाहाँ नेपाल मजदुर किसान पार्टीया छ्याञ्जे नपां सांसद प्रेम सुवाल पार्टीया राजनैतिक प्रतिवद्धता काथं खप कलेजत निःस्वांगु खौं न्हि थांसे राजनीति देश व जनताया निःस्वार्थ सेवा खः धायोदिल ।



राजनैति व बेइमानी बिस्क खः धायोदिसे सांसद सुवाल राजनीति थूपिसं बेइमानी याइमखु धायो दिलसा देया माथां वांक विकास याय्गुलि बःयाय् मःगुलि संघीय सरकारं यें व छगू नेगू सहरय् बसाइ सराइ अपलं याकय् तांगुलिं फोहरमैला व अपलं प्रदुषण जूगु नपां जिल्लाय् जिल्लाय् लौं दय्कसां छें फुक्क खाली जुजुं वगु खौं प्याहाँ वयो च्वंगु खौं ब्याकः दिल । वयकलं खप नगरपालिकां चाय्कः तःगु न्हय्गु कलेजय् देया थीथी जिल्लां पीप्यद्र स्वयो अपः ब्वनामिपुं भर्ना जुय धुंकगु खौं नपां भौतिक पूर्वाधारदःगु खप विश्वविद्यालय चाय्केता खप नगरपालिकाता सरकारं अनुमति मब्यगु देश व जनताता भिं मयागु खः धायोदिल । नपां प्रधानमन्त्री जुपुं देशघाती महाकाली सन्धी थमनं याडागु दावी याडः च्वंगु खौं न्हिथांसें नेपःया जल स्रोत छगू छगू याडः भारतता बिय्गु ज्यात स्व स्व सरकारया हःनय् बुद्धिजीवीपुं निरिह जुय मज्यु धायोदिल ।

खप नगरपालिकाया प्रमुख नपां कलेज सञ्चालक समितिया नायो भाजु सुनिल प्रजापति जुं खप इन्जिनियरिड कलेज खपया ब्वस्यलागु कलेज काथं हज्याडः च्वंगु अजनं बांलाकय्ता हकनं मिहन्त याय् मःगु खौं व्याकसे खप नगरपालिकां तःभवखा चां छगू सयकेगु मौका काथं कायो थानाया सम्पदा ल्यंकः, म्वाकः भिंकः तयो खप दे देयाय् हे ब्वस्यलागु नमूना सहर काथं हज्याकय्गु काथं ज्या साडः च्वडागु खौं काडः दिल ।

खप देया विकास विदेशी तय्के ध्याछ धेबा हे मकःसिं जनताया साथ व ग्वाहाली हज्याक वयागु खौं व्याकसे वयकलं खपया म्हासिड्का ल्यंकः तय्ता सम्पदा ल्हवनय्-कानय् व दानय्गु ज्या उपभोक्ता समिति पाखं याक वयागु, देया लागिं मःपुं दक्ष जनशक्ति ब्वलांकय्गु, बांलागु, भिंगु शिक्षा बियो न्हूँ न्हूँगु प्रविधिपाखं दे हज्याकय्गु तातुडः खप नगरपालिकां थीथी ब्वनय्कुथित न्ह्याकः वयो च्वंगु खौं नपां ल्यासे ल्याम्होपुं विदेशय् वाडः च्वंगुलि सरकार व म्यानपावर कम्पनित मुख्य दोषी खः धायो दिल ।

उपप्रमुख नपां कलेज सञ्चालक समितिया न्वकु रजनी जोशीं खप नगरपालिकां चाय्कः तःगु कलेजया तातुना पू वांकय्गु ज्या थाना ब्वडः च्वंगु ब्वनामिपिसं याडः च्वंगुलि लय्ता प्वकसे देया लागिं च्वजःपुं जनशक्ति ब्वलांकसे कलेज थःगु नां व गरिमा अजः च्वजाय्केगु ज्या याडः वगु खौं काडः दिल ।

खप इन्जिनियरिड कलेजया प्राचार्य ई.सुजन माकं खप इन्जिनियरिड कलेजय् नेपालय् दकलय् न्हापुं भूकम्प इन्जिनियरिड ब्वकिगु कलेज काथं हज्याडः वगु खौं ब्याकसे नेपःया कला-संस्कृति व सम्पदा संरक्षित याय्ता बिचः याड अर्वांन डिजाइन व कन्जर्भेसन विषयता महत्व बियो ब्वंकः ब्वडः, वयो च्वंगु खौं काडः दिल ।

खप कलेज अफ इन्जिनियरिडया प्राचार्य ई.सुनिल दुवालं स्नातकोत्तर तगिं स्नातक स्वयो अपलं तः ब्यागुलिं व्यापक दृष्टिकोण तयो ब्वनामि पिसं ब्वनय्गुलि बः याय्मः धायो दिल ।

ज्या इवःसं खप इन्जिनियरिड कलेजया उप प्राचार्य डा. सुवेगमान बिजुक्छें जुं स्नातकोत्तर तगिं धाय्गु शिक्षण सिकाइ स्वयो अनुसन्धानय् लिधंसाय् जुइगुलिं ब्वनामिपिसं अज थाकु मचःसैं अध्ययन याय् मःधायोदिल ।

विभागीय प्रमुख डा. मन्जिप शाक्यं भूकम्प इन्जिनियरिडय् ३११ म्हा व अर्वांन डिजाइनय् १८१ म्हा याडः ४२२ म्हा सिं स्नातकोत्तर तगिं ब्वनय् धुंकगु खौं काडः दिल ।

ज्या इवःया मू पाहाँ सांसद सुवालं स्नातकोत्तर तगिंया च्वजःपुं ब्वनामिपुं मेघास्मी खतिवडा व युरिका शाक्यता नगद नपां लसःहना पौ लः ल्हाडः दिल ।

ज्या इवः सं च्वजम्हा ब्वनामि मेघास्मी खतिवडा व युरिका शाक्य पिसं नं कलेजया खायें थःगु अनुभव काडः द्यगु खः ।

ज्या इवः सं विभागीय प्रमुख लिबास फैजुं नं न्वचु तयो द्यगु खः ।

यातु बारय पुखुसिथय् सुचुकुचु

जेठ २ गते

खप नगरपालिकाया गवसालय बः छिया छकः मदिकक याडः वयो च्वंगु सुचुकुचु ज्या इवः, बिहिबार जेठ १ गते खप नगरपालिका वडा नं. १० या कमल विनायक पुखु (यातु बारय) चाकलीं सुचुकुचु ज्या इवः न्ह्याकल ।

ज्या इवः सं खप नगरपालिका वडा नं ८ या वडाध्यक्ष नपां वातावरण समितिया दुजः कृष्ण प्रसाद कोजुं खप नगरपालिकां चुनावी घोषणापत्र काथं नगरपालिकाया जनप्रतिनिधिपुं, कर्मचारी, स्थानीय मनूत, टीम, क्लब, ब्वनयकुथि अलय मेमेपुं बुद्धिजीवीपुं जाडः बःछिया छक नगरया थी थी थासय् सुचुकुचु याडः वगु खाँ व्याकसे सुचुकुचु ज्या इवः छगू अभियान काथं हछ्याडः वयो च्वंगु गुकिं थःगु व थःथाय् धाय्गु भावना पिज्वइगु खाँ व्याकसे यातु बारय थिइकः अपराधिक ज्या इवः त अप्वयो च्वंगुलिं स्थानीय मनूतय्सं होस याय् माल धायोदिल ।

अथेहे खप नगरपालिका वडा नं १० या वडाध्यक्ष लक्ष्मी प्रसाद ह्योमिखां खप नगरपालिकां थःथःगु थाय्या लकस बांलाकय्ता थःथ पिंसं थःथाय् सुचुकुचु याय्गु तातुडः बःछिया छक १ गते व १५ गते सुचुकुचु ज्या इवः न्ह्याकः वयो च्वंगु खाँ व्याकः दिल ।



वयकलं सुचुकुचु ज्या इवःसं नगरपालिकाजक मखु स्थानीय जनताया नं साथ व ग्वाहाली दय्मः धायोदिसे सकलसिनं ध्वगिइगु व ध्वमगिइगु फोहर विस्कं बिस्कं तयो सफाइ गाडी खय् तयो ग्वाहाली याय्ता नं इनाप याडः दिल ।

ज्या इवः सं वडा सचिव रामेश्वर कोजुं नं न्वचु तयो दय्गु खः ।

चिनियाँ जनप्रतिनिधि सभाया उपाध्यक्ष खपय्

जेठ ३ गते

चिनियाँ जनप्रतिनिधिसभाया उपाध्यक्ष सियाओ चिएया न्ह्यलुवाय वपुं प्रतिनिधिमण्डलं शनिवार खपया ऐतिहासिक व सांस्कृतिक सम्पदात मन क्वथिइक स्वयो दिल । उगु पुचःता नेपाल मजदुर किसान पार्टीया छ्याञ्जे नपां संधीय सांसद प्रेम सुवाल व खप नगरपालिकाया प्रमुख सुनिल प्रजापति जुं खपया



लाय्कु ध्वाकाय् लसकुस याडः दिल ।

उगु पुचलं लायकुली च्वंगु कला संग्रहालय, लँधुवाका, डय्डापा इयो दरवार, फसिदेगः (शिलु महाद्यो), तःमाही जुयो तालाकवय थ्यंकः आनाया चाया भाला छिगु नं स्वयो दिल ।

भ्रमणया इवलय उपाध्यक्ष सियाओचिए जुं खपया मूर्त अमूर्त सम्पदा व थानाया तःभ्वखाचालिपा ल्हवनय-कानय व दानय् धुकः भिंकः, बांलाकः ल्हवडः तःगु स्वय दयो लयता प्वकसे नेपः दे चीनया स्वापु व मित्रता युग युगतक ल्यडः च्वनिगु विश्वास प्वकसे नेगू दे दशवीया सांस्कृतिक कालबिलत अपलं याय् मःगु बिचः प्वकः दिल ।

उपाध्यक्ष चिए जुं तःभ्वखाचा २०७२ या भ्वखा ब्वय धुकः या ज्या व सहकारीया ज्या इवः या खाय् विशेष चासो तयो दिल ।

स्वय सिधयक सांसद सुवाल पार्टीया पिथनात, नगर प्रमुख प्रजापति जुं नगरपालिकाया पिथतात उपहार काथं लःल्हाडः दिल ।

स्वास्थ्य शिविर

जेठ ३ जाते

खप नगरपालिका वडा नं. २ या गवसालय शनिवार मचाछँ व दुरुप्वया क्यान्सर सम्बन्धी जुगु शिविरसं खप नगरपालिकाया उप प्रमुख रजनी जोशी शिक्षानपां उसायँ भिंक म्वायगु सय्केता ई काथं स्वास्थ्य शिविरत चाय्कः वयो च्वंगु खाँ व्याकसे समाज हज्याय्ता मिसात मिजंत स्वस्थ जुय मः गु खाँ काँ कां सचेत याय् मःगु खाँ काडः दिल ।



सरकारं जनतातय्ता बुसानिसँ सीय धुंक तक्या सेवात बियमःगु अथेनं पुँजीवादी सरकारं जनताता मःगु आधारभूत सेवातक वियमफूगु अवस्थाया खाँ कुलः दिसे वयकलं खप नगरपालिकां समाजवाद उन्मुख ज्या याडः वगु खाँ व्याकः दिल ।

वयकलं मिसातनं आर्थिक रुपं सक्षम जूयता लाहातय छगू नं छगू ज्या दयमःगु खाँ व्याकसे खप नगरपालिकां लाहातय ज्या दैगु तालिम ब्यू ब्यू वयो च्वंगु खाँ काडः दिल ।

वडाध्यक्ष हरिप्रसाद बासुकला (२) या सभानायोलय्

न्याकगु उगु स्वास्थ्य शिविरय् वयकलं वडां याडः च्वंगु विकास निर्माणया ज्यात कुलः दिसे सहकारी लागाय् वयो च्वंगु समस्या म्हावाय्ता स्थानीयवासीत सचेत जुयमः धायो दिल । वयकलं जनताया सल्लाह सुभावा कायो हे विकास निर्माणया योजनात दय्केगु ज्या जुयो च्वंगु खाँ नं काडः दिल ।

उगु शिविरय् वडाया दुजःपुं श्याम सुन्दर मातां व मञ्जुमैयां लाखां नं न्वचु तयो द्यूगु खः । खप अस्पतालया प्राविधिक ग्वाहालीखय् न्याकगु उगु शिविरय् १४८ म्हा सिं स्वास्थ्य जाँच याकगु खः ।

अथेहे वडा नं ३ व खप अस्पतालया प्राविधिक ग्वाहालीखय् ३ वडाया बंशगोपालय् न्हाय, न्हयपं व घाँटीया स्वास्थ्य शिविर जुल ।

उगु शिविरसं भनपा ३ या वडाध्यक्ष राजकृष्ण गोरां डा. एलिसा महर्जनता सामान लःल्हाडः न्याकगु शिविरय् खप नगरपालिका जनताया मंकःगु संस्था खः, खप नगरपालिकां नगरबासीपनिगु भावनानपां मिलययाड, नगरबासीपनिगु सल्लाह, सुभावा व ग्वाहालीखय् ज्या साडः च्वंगु खाँ काडः दिल ।

जनताया स्वास्थ्यता न्याहले हृदाय तयो इलय व्यलय थी थी ल्वयया स्वास्थ्य शिविरत चायक वगु खाँ व्याकसे वयकलं स्वास्थ्य हे धन खः, थःगु स्वास्थ्य इलय हे जाँचय् याकः ग्यापुगु ल्वचं मथिइक जुयता सल्लाह बियो दिल ।

उगु ज्या इवः सं कार्यपालिकाया दुजः सुनिता अवालं नं न्वचु तयो द्यूगु खः ।

शिविरय् मुक्कं मिसात मिजंत याडः १०५ म्हा सिनं स्वास्थ्य परीक्षण याकगु खः । आना निःशुल्क वास नं इडः ब्यूगु खः ।

तालिम

जेठ ५ जाते

खप नगरपालिका सहकारी अनुगमन समितियापाखं घलाँते ३ या वचत संस्था त अनुगमन यात । संस्थाया नायो ल्याचा बांलाक तयो मेपिन्ता मक्यंगु, कर्मचारीतय्सं बचत मुडः थमनं हे छ्योगु, बिना धितो ऋण ब्यूगु, नेदा हाँ निसँ लेखा परीक्षण व साधारण सभा मयागु, दां दां सञ्चालक समितिया बैठकमतःगु, कार्यक्षेत्र पिनय याय्पुं नपां आर्थिक कारोबार यागु, दुजः पनिगु बचत लिता मब्यूगु खानय् दः । उगु अनुगमनय् सहकारी अनुगमन समितिया कजि हरि प्रसाद बासुकला, श्याम सुन्दर मातां, हरिरत्न गोर्खाली, कृष्ण गोपाल चगुठी, सिद्धिराम अवालपुं भःगु खः ।

वैशाख २९ जाते

खप नगरपालिकापाखं चाय्कः तःगु शिशु स्याहार केन्द्रय ज्या साडः च्वपुं कर्मचारीपिन्ता छन्हूया तालिम क्वचाल ।



गः हितिया लक्ष्मी नरसिंह देगः उलेज्या



जेठ ६ गते

नेपाल मजदुर किसान पार्टीया नायोभाजु नारायणमान बिजुक्छें रोहित जुं खप नगरपालिकाया बजेटय् दानय् धुंकु खप नगरपालिका वडा नं ४ गःहिति च्वंगु लक्ष्मीनरसिंह देगः या मङ्गलबार उलेज्या नपां ल्वहें पौ पलिस्था याय्गु ज्या याडः दिसे खप नगरपालिकापाखं पिथांगु लक्ष्मीनरसिंह देगःया महत्वपूर्ण खाँया धलः मूना 'लक्ष्मीनरसिंह मन्दिर पुनःनिर्माण २०८२ साफू व लक्ष्मी नरसिंह मन्दिर पुनःनिर्माणको प्राविधिक प्रतिवेदन' पिता ब्वज्या याडः दिल ।

उगु ज्या इवःसं नायो भाजु बिजुक्छें जुं तः भवखाचां थुडः ब्यूगु लक्ष्मीनरसिंह देगः दानयता ग्वाहालीयापुं सकलसिता सुभाय देछासे जनतानपां मिलयजुयो ज्या सांसा अःपुक ज्या याय् फैगु दसू खपं क्यडः च्वंगु खाँ ब्याकसे नरसिंह शक्तिया प्रतीक खः । लक्ष्मी नपांया नरसिंह सन्तुलन (उथिंग्यंगु) या प्रतीक जुड्गु खाँ ब्याकसे शक्तिया बलय् जक त्याइगु खाँ सत्य मजुइगु खाँ ब्याकः दिल ।

कला-संस्कृति ल्यंकः, म्वाकः, भिंकः तयगु थःकाथं हे सेवामुखी ज्याखः धायोदिसे वयकलं फुक्क जनतात थःगु भःपियो ग्वाहालीमिकाथं ज्या यागुलिं हे थापामछिं जःगु बांलागू देगः धस्वाकय फःगु खाँ ब्याक दिल ।

कला संस्कृति ल्यंकः, म्वाकः, भिंकः तयगु नपां खपया डकःमि, सिँकःमि व थी थी लागाया कलापाखं थःगु, लाहातयया ज्या (शिल्प) व मेहनत पिब्वयगु मौका नं दःगु खाँ ब्याकसे वयकलं सम्पदा ल्हवनय्-कानय् व दानय्गु ज्या ठेक्कां बिय मज्यूगु खायँ सकलें सचेत जुयमः धायो दिल ।

खपया जनतात फुक्क छप्पा छधि जुयगु व थः वं थःया भावनां ज्या सानय्गु हे खपया बिस्कं पहः या विशेषता जुयो वगु

खाँ नं वयकलं काडः दिल ।

खप नगरपालिकाया प्रमुख सुनिल प्रजापति जुं २०७२ सालया तः भवखाचा ब्वय हाँ या तस्कं बिस्कं पहःया मल्लकालीन मौलिक पहल्य हे देगः दाडागु खाँ ब्याकसे लक्ष्मीनरसिंह देगः दानयता खप नगरपालिकां ७ करोड ७७ लाख लागत इस्टिमेट पारित यागुलि उपभोक्ता समितिपाखं ४ करोड ८३ लाख तका खय् हे दानय्गु ज्या क्वचःगु खाँ काडः दिल ।

विदेशी ग्वाहाली मकःसैं हे २०७२ सालया तःभवखाचां थुडः ब्यूगु सच्छि मयाकं सम्पदात थःगुहे बाहुबलं ल्हवड, दानय् फःगु खपया गौरव जूगु खाँ ब्याकसे प्रमुख प्रजापति जुं खपया नां जःगु ज्या जुयो च्वंगु नपां खपया महत्वपूर्ण सम्पदा ल्यंकः म्वाकः तयगु ज्या मध्ये लक्ष्मी नरसिंह देगः दाडागु नं छगू खः धायो दिल ।

खप नगरपालिकाया उप प्रमुख रजनी जोशीं थयं मथयं इतिहासया प्वाथय हे बिडः वानिथें च्वंगु लक्ष्मी नरसिंह देगः तस्कं बांलाकः भव्य याडः दानय् फःगु नपां देया छगू महत्वं जःगु सम्पति भीगु पहलं ल्यंकः, म्वाकः, भिंकः तय फःगु ज्या जूगु दःधायो दिसे स्वनिगलय भीगु थःगु मौलिक पहः ल्यंक तयगुलि खप नगरपालिका हृदाय च्वडः ज्या साडः वगु नपां लक्ष्मीनरसिंह देगः नं मौलिक शैलीं हे दाडः देया सम्पति म्वाकः ब्यूगु खाँ काडः दिल ।

भक्तपुर जिल्लाया प्रमुख जिल्ला अधिकारी गोपाल प्रसाद अर्याल जुं खप नगरपालिकां सम्पदा ल्यंक म्वाकः भिंकः तयगु ज्यां राष्ट्रिय व अन्तरराष्ट्रिय पर्यटन प्रवर्द्धनपां देया आर्थिक विकासय् नं न्हिथानय् बहगु ज्या याडः वगु खाँ ब्याकसे विनाशकारी तःभवखाचां सम्पदा स्यंकः थुडः ब्यूसांनं जनतां थुकिता हकनं पुलांगु पहलय हे दानय् धुंकुगु तहांगु ज्या जूगु खाँ काडः दिल ।

सच्छि व डय्यागुगु स्वप पौ, ब.छि पौ(पाक्षिक)

पुरातत्व-विभागया महानिर्देशक सौभाग्य प्रधानाङ्गं सम्पदा ल्यंकः, म्वाकः तयगुलि परम्परागत सीप, प्रविधि, पहः व दानय्गु हलं ज्वलं छ्यलः वगु ख्वपया च्वछाय बहगु ज्या खः धायोदिसे सम्पदा दानय् धुकः सलंस दाँ हाँ निसें या भीगु पहः व म्हासिङ्का नं म्वाङः वगु दः धायो दिल ।

वयकलं नेपः देशय् दायें छगू तः तः हांगु भ्वखाय् ब्वङ्गु खाँ ब्याकसे सम्पदाया ई काथं ल्हवनय्-कानय्गु ज्याखय् नं बिचः याय् मः धायोदिल । २०७२ सालया तःभ्वखाचा लिपा पुरातत्व विभागं ८१५ गू सम्पदात दानय्धुकुगु खाँ ब्याकसे विभागं सम्पदा प्रभाव मूल्याङ्कन क्वचाय्क जक सम्पदा पुनःनिर्माणया ज्याता हज्याकः वःगु खाँ महानिर्देशक प्रधानाङ्गं काङः दिल ।

इतिहासविद प्रा.डा. पुरुषोत्तमलोचन श्रेष्ठ थःगु पहः तांक च्वनय् धुंगु देगःहकनं म्वाङः वम्हा थें पुनर्जीवन दःगु तः हांगु उपलब्धी खः धायोदिसे जनप्रतिनिधिपुं व जनताया छप्पा छधिं हे थ्व याय फःगु खः धायोदिल ।

ख्वप नगरपालिकां मूर्त अमूर्त सम्पदा फुक्क ल्यंकः म्वाकः तय्गु ज्या याङः वगु खाँ ब्याकसे वयकलं देगः दानय् धुकः च्वयो दस्तावेजीकरणता नं हृदाय तयो ज्या साङः च्वंगु ख्वप नगरपालिकाया मेगु विशेषता खः धायोदिल ।

लक्ष्मी नरसिंह मन्दिर पुनःनिर्माण प्राविधिक समितिया कजि नपां ख्वप इन्जिनियरिङ कलेजया प्राचार्य ई. सुजन मार्कं देगः दानय्गु ज्याखय् थःनं दुथ्याय् दःगु थःता नं गौरब ताय्कागु खाँ ब्याकसे लक्ष्मी नरसिंहया पुलांगु देगः या भ्या भाति जानकारीया दश्वी नं मेमेगु देगः या अध्ययन अनुसन्धान याङः थुकिया प्राविधिक ज्या हज्याकागु खाँ काङः दिल । देगः दानय्गु इवल्य स्थानीय कालिगढपिनि पाखंन्हूगु व परम्परागत ज्ञान सय्के दःगु खाँ काङः दिल ।

ज्या इवःसं लक्ष्मी नरसिंह मन्दिर उपभोक्ता समितिया नायो न्हुच्छेराम भेलेजुं देगः दाङागुया प्रतिवेदन पिब्वयो दिल ।

ख्वप नगरपालिका प्रमुख प्रशासकीय अधिकृत वसन्त भट्टराई जुं सुभाय् देछः से लक्ष्मी नरसिंह देगः दानय् धुकु तःमाही लागा अभः स्वय हाय्पुगु थाय् जूगु खाँ काङः दिल । ज्या इवःसं ख्वप नगरपालिका वडा नं. ९ या वडाध्यक्ष रविन्द्र ज्याख्वं नं न्वचु तयो द्यूगु खः ।

ज्या इवः सं मू पाहाँ नारायण मान बिजुक्छें जुं देगः दांबलय्का डकःमि नायो जगताराम न्हिसुतु व सिँकःमि नाइके बलराम शिल्पकारता दोसल्ला डयकः हाङः दिल ।

देगः या उलेज्या हाँ ख्वपया लायकुलिं ख्वप नगरपालिकाया प्रमुख सुनिल प्रजापतिया न्ह्यलुवाय सांस्कृतिक बाजागाजा नपां क्वाछें, तः माही जुयो लक्ष्मी नरसिंह देगः तक ज्याली न्ह्याकगु खः ।

ख्वप नगरपालिकाय् जनप्रतिनिधिपिसं बहालीयागु स्वदा फूगुया लसताय लक्ष्मी नरसिंहदेगः उलेज्या यागु खः । लक्ष्मी नरसिंह देगया निःस्वानय्गु ज्या वि.सं. २०७८ मङ्सिर २७ गते नेमकिपाया नायोभाजु नारायणमान बिजुक्छें (रोहित) जुं याङः द्यूगु खः ।

देगःया मुक्कं लागत इस्टिमेट रु ७ करोड ७७ लाख दःगुली ४ करोड व ८३ लाख खर्चखय् दानय् धुकुगु खः । उगु देगःता २२ लाख ६६ हजार स्वयो अपः नगद ग्वाहालीकाथं ब्यूगु खःसा ७५० म्हा स्वयो अपः सिनं ज्या साङः श्रमदान यागु खःसा लाखौतका क्वतिया जिन्सि ग्वाहाली यागु खाँ देगः पुनःनिर्माण उपभोक्ता समितिं धःगु दः । लक्ष्मीनरसिंह देगः दानय् धुकुः तःमाही व गःहिति अज छगू तस्कं स्वय हाय्पुगु थाय् व देगः जूगु दः ।



खप नगरपालिकाय जनप्रतिनिधिपुं स्वदाया कार्यकाल क्वचाय्कल

जेठ ६ गते

नेपाल मजदुर किसान पार्टीया छ्याञ्जे नपां संघीय सांसद प्रेम सुवाल नगरता यचुपिचुक, सुचुकुचु याडः तय्ता नगरया धः व सुचुकुचुखय नगरपालिकां बिचः याय् मःगु खाँ खप नगरपालिकाय जनप्रतिनिधिपिसं बहाली यागु स्वदा फुगुया लसताय काडः दिसे नगरता यचु पिचुगु, स्वच्छ, सांस्कृतिक नगर व न्हयकनय स्वयथें पारदर्शी याय्गु तातुडः थुगु नगर हज्याडः च्वंगु नपां शैक्षिक संस्थाया लिक्क सूतीजन्य पदार्थ व (मदिरा) श्वै ऐला मिडके मबियगु, अजगु पसः तय्के बिय मज्यु धायोदिल।



वयकलं उपभोक्ताया हक हितया लागिं विचः याडः इलय ब्यलय बजार अनुगमन याय्मः धायोदिसे पत्रु नसां जनताया जिवय मनिंक जिउ स्थकिगुलि जिवयता निंगु जक नसा नय्ता जनताता ग्वाक्य् मः, धायमः धायोदिल।

नगरपालिकाता थःगु तुतिखय दानय् फय्केगुलि कुतः याय मःगु खाँ ब्याकसे वयकलं ब्वनयकुथिया शिक्षा बांलासा विश्व विद्यालयया शिक्षा नं अथेहे बांलाइगु खाँ ब्याकसे कलेजया शिक्षकपुं ब्वनयकुथि वाडः स्वः वानय् मःगु सुभावा बियो ब्वनयकुथिया शिक्षा अज च्वजाय्के मःगु, दे माथांवांक विकास यायगुलि सरकारं बिचः याय्मः धायो दिल।

ज्या इवः या सभाया नायो नपां खप नगरपालिकाया प्रमुख सुनिल प्रजापति आ.ब. २०८१/८२ सं नगरपालिकां यागु मु मु ज्याया खाँ कुल दिसे नगरपालिकां संविधान व कानूनं ब्यूगु अधिकारय् च्वडः थी थी विकास निर्माण व मेमेगु ज्या नपां छगू नगरस्तरीय महत्वपूर्ण योजना क्वचाय्केगु तातुडः ज्या साडः वगु खाँ काडः दिल।

भक्तपुरया न्हयलुवापिसं याडः द्यूगु त्याग, परिश्रम,

व दूःखया लिचवलं खप दे थौया अवस्थाय् वय फःगु खाँ ब्याकसे प्रमुख प्रजापति जुं राजनीतिक दलया नेतात कल्पनाशील जुयो देश व जनताया नितिं समर्पित जुसा देश व जनता मथां हज्याकय् फैगु दसु खप दे जुयो च्वंगु खाँ काडः दिल।

स्थानीय तह प्रजातन्त्रया जग जूगुलिं स्थानीय तह अधिकारं जःसादक प्रजातन्त्र बल्लाइगु खाँ कुलः दिसे देश व जनताया इमानदारीपूर्वक सेवा हे, राजनीति खः धाय्गु मान्यता, ज्वडः जनप्रतिनिधिपिनिगु क्षमतां फःथें खपया शिक्षा, स्वास्थ्य, सम्पदा ल्यंकः म्वाकः तय्गु, सुचुकुचु, विकासनिर्माण थजगु ज्यात हदाय तयो ज्या साडः वयागु खाँ काडः दिल।

खप नगरपालिकाया उपप्रमुख रजनी जोशीं जनताया साथ व ग्वाहली मदय्क खपया विकास याय् मफैगु खाँ ब्याकसे जनताता निर्वाचनया इलय बियागु बचं काथं खप नगरपालिकां घोषणापत्रया लिधंसाय ज्या साडः वयागु खाँ व्याकः दिल।

सहप्राध्यापक विश्वमोहन जोशीं खप नगरपालिकाया जनप्रतिनिधिपिसं अपलं ब्वस्यलागु ज्या याडः वगु खाँ नपां जनताया साथ व ग्वाहली जक खप देया विकास सम्भव जुगु नपां छुं रचनात्मक सुभावा बियोदिसे खप दे किसानत अपलं दःगु थाय् जुगुलिं उत्कृष्ट किसानतय्ता ग्वाकय्गु ज्या इवः हयमःगु, खप अस्पतालया सिटी स्क्यान, एम.आर.आई. थजगु सुविधात ताडः हज्याय् मः धायोदिल।

खप नगरपालिकापाखं चाय्कः तःगु खप कलेज अफ इन्जिनियरिङ्गया प्राचार्य ई. सुनिल दवालं थुगुकलेज निःस्वसां निसें थौतक खय २ हजार ७६९ म्हा ब्वनामिपुं भर्ना जूगुलि अःतक खय १ हजार ५६४ म्हा ब्वनामिपुं ब्वनय धुंकगु दः धायोदिल।

खप अस्पतालया निमित्त मेडिकल डाइरेक्टर डा. मजेश प्रताप मल्लं खप अस्पतालं स्वास्थ्य लागाय हिक् पुलय धुंकगुलिं म्हवचा धेबा खय भिंगु स्वास्थ्य सेवा बियगु हे खप अस्पतालया बाचा खः धायो दिल।

खप कलेज अफ ल या प्राचार्य अनिता जधारी थुगु



कलेज निःस्वांसांनिसें स्वदाया दुनयें ६० म्हासिया ल्याखं १८० म्हा
व्वनामिपुं व्वडः च्वंगु खाँ नपां कलेजय् अः४२ गू जिल्लाया
व्वनामिपुं व्वडः च्वंगु खाँ काडः दिल ।

ख्वप मा. वि. या प्राचार्य लक्ष्मीप्रसाद कर्माचार्य ख्वप मा
.वि.या प्रतिवेदन पिब्वसे कलेज निःस्वांसां निसे अःतकखय् २५
हजार ५३३ म्हा व्वनामिपिसं व्वनय् धुकुगु अलय दायें दायें पतिकं
१ करोड ३० लाख तका स्वयो अपः या छात्रवृत्ति वियो वयागु खाँ
काडः दिल ।

ज्या इवः या मू पाहाँ सुवालं ख्वप नगर दुनय
नगरपालिकाया मापदण्ड काथं नियमित याडः छँ दाडः निर्माण
सम्पन्न दसि पौ कः पुं वडा नं. ५ या कृष्ण देवी सिबन्जारता
स्वंगू लाख, वडा नं ४ लक्ष्मीप्रसाद माहीकःमि व उत्तम प्रसाद
माहीकःमि पिन्ता स्वंगू लाख, वडा नं ५ या मनिषा साखता छगू
लाख व प्यद्वव डास व गुड्खुर्का वडा नं ९ या सुमित्रा नायभा

सच्छि व ड्यय्यागूगु ख्वप पौ, बःछि पौ(पाक्षिक)

श्रेष्ठता नेगूलाख व पीप्यद्व व नेस व गुड्कर्का, वडा नं ५ या
राधेश्याम तुल्लिवाख्योता छगू लाख डाद्व व चयखुर्का, वडा नं. ३
या सुलोचना धुख्वता स्वंगू लाख याडः अपा, प्वल्लहँअपा या
अनुदान काथं ब्यूथु खः ।

ज्या इवः या सभाया नायो नगर प्रमुख प्रजापतिजुं
नगरपालिकाया ज्या सांपुं च्वजः पुं कर्मचारी पिन्ता व ३० दा
सेवा यापुं कर्मचारी पिन्ता हनापौ व दिर्घसेवा पौ बियो हानय ज्या
याडः दिल ।

ज्या इवः सं ख्वप नगरपालिकाया प्रमुख प्रशासकीय
अधिकृत वसन्त भट्टराई जुं सुभाय देछायो दिसे जनप्रतिनिधि,
कर्मचारी व जनतानपां छप्पा जुयो ज्या सां गुलिं हे थौं ख्वप दे
दयके फःगु खः धायोदिल ।

ज्या इवः सं वडा नं. ७ या वडाध्यक्ष उकेश कवां नं
न्वचु तयो द्यूगु खः ।

युरोपियन युनियनया राजदूतपुं ख्वपय

जेठ ६ गते

नेपः या लागिं युरोपियन
युनियनया राजदूत नपां युरोपया
मे मेगु देशया राजदूत पिसं ख्वप
दे चाहिल दिल । डेलिगेसन अफ
द युरोपियन युनियन टु नेपालया
एम्बेसेडर भेरोनिक लोरन्जो व
डिपुटी हेड अफ डेलिगेसन, हेड
अफ पोलिटिकल, प्रेस एण्ड
इन्फर्मेसन सेक्सन्या थोमस
मिलारया न्हयलुवाय नीनेम्हा
राजदूत व स्वम्हा दुतावासया
कर्मचारीपुं नपां नीडाम्हा सिया भ्रमण पुचः ख्वपया लाय्कुलि
तःमाही, दतात्रय, तालाक्व व नगरया ऐतिहासिक लागाय् भायो
स्वयो दिल ।

प्रतिनिधिमण्डलय् अस्ट्रिया, बेल्जियम, बुल्गेरिया, चेक
रिपब्लिक, डेनमार्क, इस्टोनिया, आयरलायण्ड, ग्रीस, स्पेन,
इटाली, साइप्रस, लिथुआनिया, लक्जम्बर्ग, हंगेरी, माल्टा,
पोल्याण्ड, पोर्चुगल, रोमानिया व स्वीडेनया राजदूतपुं नपां
दूतावासया कूटनीतिज्ञत नं भःगु खः ।

भ्रमण पुचःता ख्वप नगरपालिका पर्यटक सूचना व
सेवा केन्द्रया प्रमुख नपां सहायक निर्देशक गौतम प्रसाद लासिवां



ख्वप लायकुया खौमा ध्वाकाय् लसकुस याडः द्यूगु खः ।

ख्वपया तकातपुली, पुतुम्हिचा व ख्वप नगरपालिकाया
पिथना ख्वप देया 'किपा साफू' नपां मेमेगु पिथनात उपहार काथं
लः ल्हाडः दिसे लसकुस ज्या इवः सं पर्यटक सूचना व सेवा
केन्द्रया अधिकृत शरद खत्री, मुरज दिदिया व स्थानीय लाँजुवपिसं
स्वः भःपिन्ता अःपुक ब्यूगु खः ।

भ्रमण पुचःया राजदूतपिसं ख्वपया ऐतिहासिक व मौलिक
कला-सिंस्कृति व सम्पदात ल्यंकः, म्वाकः, भिंकः तयगुलि ख्वप
नगरपालिकाया कला-सिंस्कृति व सम्पदा ल्यंकः, म्वाकः तयगु
ज्या याता च्वछायो दिल ।

नायो भाजु बिजुक्छैनु सम्पदा निर्माण स्वभाल

जेठ ८ गते

नेपाल मजदुर किसान पार्टीया नायो भाजु नारायणमान बिजुक्छै (रोहित) जुं थौं खप नगरपालिकापाखं दयकः च्वंगु अरनिको सभाभवन, थन्थु दरवार व हाडा छै पुनः निर्माण ज्या थासय हे भायो स्वयो दिल ।



स्वः भाय्गु इवलय नायो भाजु बिजुक्छै जुं सुनं मनु समाज व देशया म्हासिइका उगु देया कला, संस्कृति व सम्पदां बिइगु खाँ व्याकसे स्थानीय कला, संस्कृति व सम्पदा ल्यंकः, म्वाकः, भिंकः तय्गु ज्या स्थानीय तहं याय् मःगु खाँ काडः दिल । कला संस्कृति ल्यंकः म्वाकः तय्गु नपां देया म्हासिइका

व अस्तित्व न म्वाडः च्वनिगु खाँ व्याकसे वयकलं खप नगरपालिकां मेमेगु स्थानीय तहता डाल काय बहगु अपलं ज्या याडः वगु खाँ काडः दिल ।

अरनिको सभाभवन, थन्थु दरवार दानय्गु थजगु योजना खप देया गौरवया योजनात खः नपां थुकिं खप देया इतिहासता हकनं म्वाकः हैगु खाँ नायो भाजु बिजुक्छै जुं धायोदिल ।



स्व भाय्गुलि नेमकिपा वागमती प्रदेशया सांसद सुरेन्द्रराज गोसाई, नगर प्रमुख सुनिल प्रजापति, उपप्रमुख रजनी जोशी, वडाध्यक्षपुं श्यामकृष्ण खत्री(१), उपेन्द्र सुवाल (४) प्राविधिक कर्मचारी व स्थानीय जनताया सहभागिता दःगु खः ।

खपया मेलम्चीया नाः स्थायी काथं इडः वियगु तयारी

जेष्ठ ८ गते

खपय् मेलम्चीया नाः स्थायी काथं इडः वियगु ज्या इवः हज्यागु दः । काठमाडौं उपत्यका खानेपानी व्यवस्थापन बोर्डया बिहिबार च्वंगु बैठकय् टेन्डरया लागिं सूचं पिब्वगु खाँ नं धायोदिल ।



खपय अः पुलांगु पाइप अस्थायी काथं त्वनय्गु नाः इडः बियो च्वंगु खः । नेकगु चरणया नाः इडः बियगुलि लिपा लाइथे च्वंगुलिं खप नगरपालिकाया थःगु हे खर्च पाण्डु बजार निसें खपया थी थी थासय् पुलांगु पाइपय् स्वाडः स्वदाहाँ निसें थी थी चरणय् खप देशय् नाः इडः बियो च्वंगु खः ।

मेलम्चीया नाः इडः बियता न्हूंगु पाइप स्वाय्गु इलय गतां मिं न्वल धःसा दमकलता नाः थानय् छिंकः 'फायर हाइड्रान्ट'

'थाय् थासय् तय्गु ब्यवस्था नं दः । खप नगर दुनय ११९ फायर हाइड्रान्ट तयगु योजना नं दःगु खः ।

यें व यलायें मेलम्चीया नाः इडः बिइगु न्हूंगु पाइप याडः च्वंगु दः । आना नं आकाभाकां मिं न्वलः धःसा नाः थानय्ता थाय् थासय् 'फायर हाइड्रान्ट' तयो तःगु दः । अलय थी थी निकायया दथ्वी मिलय जुयो ज्या मसांगुलिं खानेपानीपाखं तयो तःगु फायर हाइड्रान्टता मेगु निकाय पिचयाडः नेकगु ढलान याडः छलय्ता थाकुइगु काथंया ज्या जुयो च्वंगु खाँ बैठकय् न्हिथांगु दः ।

बैठकय् काठमाण्डौ उपत्यका खानेपानी व्यवस्थापन बोर्ड नियमावली २०६४ संशोधन प्रस्तावया खायें नं छलफल जुल । स्वापुदःपिनिगु सुभाबलिपा उकिता पारितयाय्ता खानेपानी मन्त्रालय छ्वय्गु खाँ नं निर्णय जुल ।

काठमाण्डौ उपत्यका खानेपानी व्यवस्थापन बोर्डया नायो नपां काठमाण्डौ महानगरपालिकाया प्रमुख बालेन साहया नायो सुई बोर्डया बैठक च्वंगु खः । बैठकसं यल महानगरपालिकाया प्रमुख चिरीबाबु महर्जन, खप नगरपालिकाया प्रमुख सुनिल प्रजापति, केपु नगरपालिकाया प्रमुख कृष्ण मान डंगोल नपां मेमेपुनं भःगु खः ।

राजधानी स्वनिगलं पिनय मयंकगुलिं स्वनिगः अस्तव्यस्त

जेठ ८ गते

नेपाल मजदुर किसान पार्टीया नायो भाजु नारायणमान बिजुक्छें (रोहित) जुं ख्वप कलेज या ग्वसालय् व विश्व विद्यालय अनुदान आयोगया ग्वाहालीखय् 'इन्भारोमेन्टल, सोसियल एण्ड गभर्नान्स रिनोभेसन' विषयया नेन्ह्या प्यकगु राष्ट्रिय सम्मेलन विहिवार उलेज्या याड् दिसे नेमकिपा पाखं देया राजधानी स्वनिगलं पिनय यंकय मःगु प्रस्ताव ३५ दा हौं हे तयागु शासक पार्टीतय्सं स्वीकारय् मयासेलिं अः राजधानी यें अस्तव्यस्त जूगु खाँ ब्याक दिल ।



गना अधिकार बिइमखु आना संघर्ष जुइगु बिचः प्वंकसे वयकलं ख्वप नगरपालिकां थें मेगु स्थानीय तहं नं विश्व विद्यालय चाय्केता फ्वनय मःगु ईलं फुक्कसिता घ्वाइतिनि धायोदिसे नेपःया मःगु फुक्क नेपाली विश्वविद्यालय जक पू वांकय् फैगुलिं ख्वप नगरपालिकां ख्वप विश्वविद्यालय चाय्के तांगु खाँ काडः दिसे देया न्ह्यलुवा जुयो च्वंपिसं विदेशी तय्के मखुसैं भीगु देया विज्ञ, बुद्धिजीवी व विश्व विद्यालयया प्राज्ञपुं नपां सल्लाहकायो ज्या सानय् मःगु, स्वतन्त्रता व स्वाधीन जूयो च्वंगु देशतय्सं थःगु हे देया विज्ञपिन्के राय सुभाब कायो स्वतन्त्रकाथं हज्याडः च्वंगु दसु पाखं भीसं सय्के मः धायो दिल ।

चीनं स्वतन्त्र जुय धुडानिं शिक्षा लागाय् तहांगु ह्यूपा हयो शिक्षाता उत्पादन श्रमनपां स्वाता अलय चीनं थःगु एडमस्मिथ दयकला धायोदिसे वयकलं विदेशी विश्वविद्यालयया पाठ्यक्रम डाल कायो दे भिं मजुइगुली सचेत याडः दिसे देया परिस्थिति व चा, फय, थाय्ता ल्वःगु उत्पादन श्रमनपां स्वापु दःगु विश्व विद्यालयया पाठ्यक्रम जूयमःगु अलय विश्व विद्यालय स्वायत्त जुयमः धायो दिल ।

वयकलं नेपाली विश्वविद्यालयया शिक्षा बांलागु, भिंगु मजुगुलिं, विदेशी विश्वविद्यालयया ल्हययो कगुलिं ज्यादयकेगु व अध्ययनया नामय् देया स्वव्यय छव्व जनसंख्या बहुराष्ट्रिय कम्पनीया दांपुं ज्यामि मजुसैं मगाडः च्वंगु दः धायोदिसे विदेशय् वानिपुं पानय्ता आइ एन जि ओ व म्यानपावर कम्पनीत तिय मः धायोदिल ।

देया परिस्थितित समालोचनात्मक काथं विश्लेषण याय मःगु खाँ कुल दिसे वयकलं बुद्धिजीवी प्राध्यापकपुं राजनीतिक व्यक्ति मखु धायगु मखुगु खाँ प्याहाँ वय मःधायोदिसे छुं नं देशया सड्कट हाचां गायो वानय्ता बुद्धिजीवी, प्राध्यापक व विद्वत वर्ग महत्वपूर्ण ज्या सांगु खाँ संसारया क्रान्तिपाखं सय्केमः धायोदिल ।

ज्या इवः या सभाया नायो नपां सञ्चालक समितिया नायो सुनिल प्रजापतिजुं म्हवचा धेबां भिंगु, बांलागु शिक्षा बियगु, २१ गू शर्दिया पंगःत हाचां गायो वानय फःपुं ब्वनामिपुं ब्वलांकय्गु तातुडः २०५८ सालया ख्वप कलेज निःस्वांगु अःख्वप नगरपालिकां न्हयगू कलेज/ब्वनय्कुथि चाय्क ७७ गू जिल्लाया न्हयद्र स्वयो अपः ब्वनामिपुं ब्वनय्गु मौका दःगु खः धायोदिल । नपां नेपःया विश्वविद्यालयत शिक्षा व अनुसन्धानया मु थाय् जुय फःगु मरुनि अलय कलेज व विश्वविद्यालय ब्वनामिपिन्ता थःगु तुतिखय् दानय् फय्केगु ज्ञानया केन्द्र जुयमःगुलि वेरोजगारी दसिपौ इगु थाय् जक जूगु दःधायोदिल ।

वयकलं अःचवजायक ब्वनय्ता दाच्छिया लाखम्हा स्वयो अपः ब्वनामिपुं प्याहाँ वानिगु खाँ काडः दिसे नेपःया सलंस कलेजत ब्वनामिपुं मदयो तिय मालिगु अवस्था वगु बुखाँ प्याहाँ वयो च्वंगु गुगु शिक्षाता व्यापारीकरण यागुया लिचवः खःधायो दिसे अपलं ब्वनामिपुं दःगु विश्वविद्यालय स्वयो म्हवचा ब्वनामिपुं दःगु अलय देया निंतिं मःपुं थःगु तुतिखय् दानिपुं ब्वनामिपुं ब्वलांकय् फःगु चिच्या - चिच्याहांगु विश्व विद्यालय मः धायो दिल ।

प्रमुख प्रजापति जुं देयाता मः काथंया कोर्स डिजाइन



याय्गु मः काथं मथां कोर्स हिलः भिंकय् फैगु सक्षम विश्व विद्यालय दःसा सक्षम जनशक्ति ठवलांन। धात्थें खवप विश्वविद्यालय वहे काथं फ्वंगु खः। विश्वविद्यालय स्वीकृति ब्यूसा देशय छगू विश्व विद्यालय ताडः वैगु जक मखु उकिं न्हँ-न्हँगु कोर्सत दय्कः थःगु तुतिखय् दानय् फःपुं ठवनामिपुं ठवलांकिगु विशेषता नं दय्की धायो दिल। वयकलं खवप नगरपालिकापाखं चाय्क तःगु कलेजतपाखं राष्ट्रिय अन्तरराष्ट्रिय सम्मेलनता मदिक्व हज्याकय्गु ज्या खाँ व्याकः दिल।

नेपाल मजदुर किसान पार्टीया केन्द्रीय दुजः नपां वागमती प्रदेशया दुजः सुरेन्द्रराज गोसाईंजुं राजनीतिसं 'इनोभेसन' दय मःगु, नेपःया सन्दर्भय नेपाल मजदुर किसान पार्टी देशया राजनीतिता लाँपु क्यडः च्वंगु अलय देया शैक्षिक लागाय गनां ह्युपा वगु दःसा व खवप कलेजय दक जुगु दः धायोदिसे थुगुसी वः वैगु व तँनुइगु अपलं जुइगु खाँ पिब्वयो च्वंगु इलय् लकसय् ह्युपा व प्राकृतिक विपत्ति गथे मथिइक जुयगु धाय्गु खाँ स्वापु

सच्छि व डय्च्यागूगु स्वप पौ, बःछि पौ(पाक्षिक)

दःगु निकायं न्हा हे तयारी याडः तयमः धायो दिल।

वयकलं यक्व यक्व सम्भावना दःगु नेपः देशय राजनीति भिंक, शुद्धिकरण जूसा दे हज्यायता उलि ई मबिइगु खाँ व्याकसे संघीयताया मर्मकाथं ज्या जुय मफुगु खाँ कुलः दिसे संघीयताया खाँ वैद्विकवर्ग चिन्तन याय् मः धायोदिल। नपां जलाखाला दे चीनया प्रविधि, अर्थतन्त्र, राजनीति व विकासया मोडल पाखं सयकः हज्याय फःसा देशय ह्युपा ह्यफै धायोदिल।

खवप नगरपालिकाया उपप्रमुख नपां कलेज व्यवस्थापन समितिया उपाध्यक्ष रजनी जोशी समाजता बुद्धिजीवीकरण याय्गु तातुडः खवप नगरपालिका हज्याडः च्वंगु खाँ काडः दिल।

नेपाल मजदुर किसान पार्टीया घोषणापत्रकाथं खवप नगरपालिकाया जनप्रतिनिधिपिसं ज्यासाडः च्वंगु खाँ व्याकसे वयकलं प्राचीन सहर खवप देता आधुनिक व डिजिटल समाजय् हिलय्ता थानाया कला संस्कृति नं म्वाकः तयमः धायो दिल।

राजनीतिक प्रतिवद्धताया लिचवः खवप शैक्षिक संस्था



जेठ ९ गते

खवप नगरपालिकापाखं चाय्कः तःगु खवप कलेजया गवसालय व विश्वविद्यालय अनुदान आयोगया ग्वाहाली 'इन्भारोमेन्टल सोसियल एन्ड गभर्नान्स रिनोभेसन' विषयया नेन्हुया प्यकगु राष्ट्रिय सम्मेलन शुक्रवार क्वचाल।

समापन समारोहया मूपाहाँ नेपाल मजदुर किसान पार्टीया छ्याञ्जे कलेजया संस्थापक नायो नपां संघीय सांसद प्रेम सुवालं सम्मेलनं क्वः छ्यागु खाँ न्हँगु पुस्ताया ठवनामिपिन्ता ज्या लगय जुइगु नपां लाँपु क्यनिगुलि विश्वास प्वकसे नेपाल

मजदुर किसान पार्टीया राजनीतिक प्रतिवद्धताया लिचवः खवप शैक्षिक संस्थात खः थुगु संस्थाय् ७७ गू जिल्लाया पीप्यद्वस्वयो अपः ठवनामिपिसं शैक्षिक सबः काय् धुकल धायोदिल।

खवप नगरपालिकाता खवप विश्वविद्यालय चाय्के बियता नेपः या संविधान २०७२ काथं विधेयक संसदय दर्ता जुयो सांसदपिन्ता इडः बिय धुकल। सरकार हिलयवं उगु विधेयक नं दिक्ु याता। अः सकारय् वापिसं संविधानय् स्थानीय तहता विश्वविद्यालय चाय्के वियगु प्रावधान मरुगु म्व मरुगु खाँ पिकायो च्वंगु दः। ग्रीस व रोमय् नगर राज्यं विश्वविद्यालय

न्ह्याकगु खः । प्र.म. व मन्त्री तय्सं थजगु खाँ बुभुपचय याडः ख्वप विश्वविद्यालय पाडः तःगु खाँ मू पाहाँ सुवालं ब्याक दिल ।

वयकलं अः राजतन्त्र लिताहय मःगु खाँ ज्वडः छुं छुं मनु तय्सं सडक आन्दोलन याडः चवंगु दः । थुगु विषय विश्व विद्यालयया प्राध्यापकपनिगु बहसया विषय जुयमःगु खः । समाज हज्याई । अः या पुँजीवादी गणतन्त्र सडकट न्हांकय् मफैगुलिं सडकट मदय्केता समाजवादी गणतन्त्र हयम धायोदिल । थुगु यथार्थ खाँ या चवसु प्राध्यापकपनिपाखं प्याहाँ वगू मरुनि धायो दिल ।

वयकलं यैया लकस हलिमय दकलय अपः प्रदुषण जूगु बुखाँ इलय ब्यलय प्याहाँ वयो हे च्वनि । पुँजीवाद, लकस, समाज व शासनता स्यंकः बिई । चुरे दोहन, खुसीया सामग्रीत उत्खनन, वार्डुँगु गँ तस्करी तयगु धन छगू नेगू जक दसु खः । अलय लबजक दैगु जूसा यगायता नं लिचिली मखु धायगु पुलांगु अनुभव खः धायो दिल ।

वयकलं नेपः या भ्रापा निसैं कञ्चनपुरतक व स्वनिगः अलय सुखेत उपत्यकातक ह्वक दुडः वानिगु प्वः दःगु अलय भूमि स्वतुडः भासय जुयो वानिगु भूगर्भशास्त्री पिनिगु बिचः प्याहाँ वय धुंकगु खाँ न्हिथासे सांसद सुवालं उगु थासय यक्व यक्व इयातुगु छँ व मेमेगु संरचनात (छँ, भवन, ताँ, लाँ) छुं नं इलय स्वतुडः वानय् फःगु खतरा खानय दः गुलिं देया माथां वांक विकास याय मःगु अलय छगू वस्तीया लिक्क कृषि व लकसया लागिं मःकाथं जङ्गल (गुँ) दय्मः धायोदिल ।

सांसद सुवालं ख्वप विश्वविद्यालय चाय्के ब्यूसा थजगु सम्मेलन च्यान्ह्या छगू छगू जुयो च्वनिगु, उकिया लागिं ब्वनामिपुं व प्राध्यापकपुं तयार जुयो च्वनय् मःगु ब्वनय्कुथि व कलेजं फुक्क ब्वनामिपिन्ता उथिग्यंक मौका बियो शिक्षित व सचेत याय् मःगु खाँ ब्याकः दिल ।

ज्या इवःया सभाया नायो, ख्वप नगरपालिकाया प्रमुख नपां कलेज सञ्चालक समितिया नायो भाजु सुनिल प्रजापतिं सम्मेलनं पिकःगु महत्वं जःगु क्वः छिडा खाँत स्वापु दःगु निकायतक थयंकय्गु कुतः याय्गु खाँ ब्याकसे ख्व नगरपालिकां संविधान व कानुनया दुनयः च्वडः ख्वपया विकास निर्माणया ज्यात हज्याक च्वडागु खाँ काडः दिल ।

वयकलं संघीयता छ्यः गु च्यादा फूय धुडानं नेपः देशय् संघीयता भिंक, बांलाक छ्यलय मफगु खाँ ब्याकसे स्थानीय तहता बियमःगु बजेट अनुदान म्हवचा यायां यंकगुलि आपत्ति प्वंक : दिसे देशय वहुदलीय व्यवस्था जुसां नेगू दलया हालीमुहाली जुयो चवंगु खाँ ब्याकसे शासन सत्ता न्ह्याकिपिसं

सच्छि व डय्च्यागूगु स्वप पौ, ब.च्छि पौ(पाक्षिक)

इमानदार जुयो ज्या मसांगुलिं जनतात राजनीति खाडः घचायो वगु खः धायोदिल ।

नेपाल, मजदुर किसान पार्टीया केन्द्रीय दुजः नपां वागमती प्रदेशया सांसद सृजना सैजुं ख्वप कलेजं देशता मः काथंया विषयलय राष्ट्रिय सम्मेलन यागु खाँ कुलः दिसे सम्मेलनं क्वः छ्यगु खाँ व जुगु उपलब्धी राज्यता लाँपु क्यनिगु विश्वास प्वंकः दिल ।

वयकलं सामाजिक न्याय, सुशासन व मानव व प्रकृतिया दश्वी हार्यपुगु स्वापु ल्यंकः तय्ता समाजय वर्ग संघर्ष मजुसैं मगा अलय अनवीकरणीय उर्जाया पलेसा नवीकरणीय ऊर्जा खः, चीनं नवीकरणीय ऊर्जा बांलाकः छ्यल चवंगु दः धायोदिसे गामयया उत्पादन सहरता इडः वियगु अलय सहरं गामय्ता सेवा बियगु नीति काथं चीनं कायो चवंगु नीति डालकाय बहजु धायोदिल ।



प्रदेशमा दुजः सैजुं नीति दयकिगु थासय भ्रष्टमन्त, बजेट दयकेगुलि ठेकदारतय्सं योयो थें याइगु, मौद्रिक नीति दयकिगु थासय भागवण्डा, याडः चवंगुलिं देश तः मलागुया दसि खः समस्या नीति दयकेगुलि हे खानय् दःगु खाँ काडः दिसे सुशासनया लागिं 'थिड्क ट्याड्क' निःस्वानयगु ज्या ख्वप सर्कलया कलेजं याय् मः धायो दिल ।

ख्वप कलेजया प्राचार्य प्रकाश कुमार श्रेष्ठं नेन्ह्या सम्मेलनय् ब्वनामिपुं शिक्षकपुं नपां सकलसिया मन ह्वयकः ब्वतिकःगु नपां अनुसन्धातापिसं महत्वं जःगु कार्यपत्र पिबवगु खाँ काडः दिल ।

ज्या इवः या मू पाहाँ सुवालं सम्मेलनय् दुतिपिन्ता दसि-पौ लः ल्हाडः ब्यूगु खः । प्यकगू राष्ट्रिय सम्मेलनया कजि डा. राजकुमार प्रधानं सुभाय न्वचु तयो द्यूगु खःसा सम्मेलनय् पिबवगु ६१ गू कार्यपत्रमध्ये अनुसन्धानकर्ता श्रेणा श्रेष्ठं पिबवगु कार्यपत्रता च्वजःगु कार्यपत्र काथं हांगु जुल ।

स्वव्य छव नेपःमिपुं विदेशय छ्वयो सरकारं विदेशी ज्यामित दुकायो च्वंगु दः

जेठ १० गते



नेपाल मजदुर किसान पार्टीया नायो भाजु नारायण मान बिजुक्छें जुया मू पाहांलय् खप नगरपालिकापाखं चाय्कः तःगु खप मा.वि. व शारदा क्याम्पस मा.वि. सं भर्ना जुयो हिन्यगू तगिंया बोर्ड परीक्षा बियो च्वंगु २०८१ भर्ना पुचःया ब्वनामिपिन्ता बिदाइ व लॉपु क्यनयगु ज्या इवः सं नायो भाजु बिजुक्छें जुं सरकारं स्वव्य छव नेपःमिपुं विदेशय छ्वयो विदेशी ज्यामित भीथाय् दुकायो च्वंगु खाँ न्हासांसे विश्व व्यापार सङ्गठनया दुजः जुय मज्यगु खाँ कां सां शासक पार्टीतय्सं गलत निर्णय याडः दुजः जूसेलिं नेपः या कलेजत तियमालिगु अवस्था वगु खाँ ब्याकः दिल ।

रेमिटयान्सं नेपालय द्रहें वैगु धेबा स्वयो अपः धेबा उच्च शिक्षा ब्वंवानिपुं व ज्या मः वानिपुं नेपः मिपिनिपाखं नेपःया धेबा प्याहाँ वाडः च्वंगु दः धायो दिसे वयकलं नेपाल विश्व व्यापार संघया दुजः जुगु या लिचवः काथं यें अपलं विदेशी विश्वविद्यालयत वयो च्वंगु गुकिं भी भन भन गरिब जुयो वाडः च्वंगु खाँ काडः दिल ।

वयकलं भीसं सुं तमचाइगु काथंया उथिगंयंक व्यवहार याइगु शिक्षा ब्वनय्कुथिनिसं हे स्यनय् मःगु खाँ काडः दिसे सं.रा. अमेरिकाय् अजनं हाकुपुं व तुइपुं जातिता पाकः व्यवहार याडः च्वंगु खाँ काडः दिसे विश्व सर्वहारा वर्गया महान नेता कार्लमार्क्स धायो द्युथें - 'अमेरिकाया छगू छगू डलरय् हाकुपुं जातिया हि बः वयो च्वंगु दः । व देश हाकुपुं जनतां दयकगु खः' धायो दिल ।

नायो भाजु बिजुक्छें जुं - भीगु देश थीथी जातया मंकःगु क्यबः थें खः । भीगु देशय नं पक्षपात दः । भीगु देशय नं जीपुं तः हांगु जात याय्पुं जक हालः ज्यासाडः जूसा अपुं ताःतः तुइमखु धायो दिसे भीसं भीपुं ब्वनामिपिन्ता पाठय्पुस्तक नपां थी थी विषयया ज्ञान बियनु, देशय् वैगु छगू छगू समस्याया खाँ थूपुं अपुं थजु भीसं भीसं ब्वनामिपिन्ता मेपिनिगु सेवा याय्गु भावना बियनु, मेपिनिगु सेवा याय्गु शिक्षा बियनु धायो दिल ।

वयकलं सं.रा अमेरिकी साम्राज्यवादया हैकम हलिमयया न्यायप्रेमी जनतां मानय याइ मखु । सं.रा अमेरिकाया जि हे खः धाय्गु अहमभाव नं न्ह्याबलें ल्यडः च्वनि मखु । अमेरिकाय अपलं राष्ट्रपति गोलीं कय्कः स्यागु दः । घमण्ड याइपुं ता ई तकः ल्यडः च्वनिमखु धाय्गु अमेरिकी इतिहासं सियदः धायोदिसे सं.रा अमेरिकां भियतनामय अपलं अत्याचार यासेलिं आखिर अमेरिकनत आनानं बिसे वानय् मःगु खाँ काडः दिसें राणातय पालय गल्लावालत गां गामय वाडः नेपः या ल्यासेल्याम्होपिन्ता गोर्खा भर्ती केन्द्रय छ्वथें अः याय्पुं गणतन्त्रवादीत व प्रजातन्त्रवादी धःपुं सरकार नं म्यानपावर कम्पनी चाय्कः ल्यासे ल्याम्होपिन्ता विदेशय छ्वयो च्वंगु, अमिसं विदेशी दलाल जुयो ज्या साडः च्वंगु खाँ याडः नेपः बुहा-बुही व रोगीतय्गु देश जुय फःगु गुकिं न्हूगु पुस्ताता अपलं दुःख जुय फःगुलिं भीसं अः निसं हे ल्यासे ल्याम्होपिन्ता विदेशय छ्वइगु नीतिया विरोध याय् म धायो दिल ।

ल्यासे ल्याम्होपिन्ता विदेशय छ्वइगु नीतिता पानय्ता म्यानपावर कम्पनिता छुःख ? धायो स्वयो च्वनय्मःगु, राहदानी वियगूलि कडा याय् फःसा विदेशय वानिगु पानय फैगु खाँ काडः दिसे वयकलं भीगु देशय भीसं हे हछ्याडः यंकय्मः धाय्गु भावना ब्वलांकः विदेशं सय्क देशय छ्यलः हछ्याय्गु याय् मः धायो दिल ।

विद्यालय सञ्चालक समितिया नायो नपां खप नगरपालिकाया प्रमुख सुनिल प्रजापति जुं थुगु विचः व चिन्तनं निःस्वांगु खाँ ब्याकसे नेमकिपाया २०५४ सालया स्थानीय निकाय निर्वाचनय 'शिक्षाता हछ्याय्गु' धाय्गु खाँ न्हाडाः तःगु दः धायोदिसे उकिया लिचवः काथं निःस्वांगु खप मा.वि. या जगय अःनेगू इन्जिनियरिड कलेज नपां न्हयगू ब्वनय्कुथित हछ्याडः च्वंगु दः । आना ७७ गू जिल्लाया न्हयद्वस्वयो अपः ब्वनामिपुं

बडः चवंगु अःतकखय् थुगु बवनयकुथी पीप्यद्व बवनामिपिसं बवनय् धुंकगु खाँ काडः दिल ।

प्रमुख प्रजापति जुं खवप सर्कलय् अपलं विषयया स्नातक व स्नातकोतर विषय बवनय् दःगु विज्ञान, व्यवस्थापन, मानविकी, इन्जिनियरिङ छु विषय बवनय् मंदः उगु विषय कायो बडः चवजाय्क शिक्षा कायो देश व समाजया सेवा याय्ता इनाप याडः दिल ।

खवप नगरपालिकापाखं चाय्कः तःगु कलेजय् दायँ ४ करोड तका स्वयो अपः या छात्रवृत्ति बियो वयागु खाँ काडः दिसे वयकलं धेबा मता धायो सुनं बवनामिपुं चवजाय्क बवनय् मखाना धाय् स्वायकः खवपया बवनामिपिन्ता न्ह्याथाय् वाडः ब्वे वासां शैक्षिक ऋण बियो वयागुलि अः तक खय् ७५१ म्हा सिनं डागु लाख तका तक ऋण कायो बडः चवंगु दः धायो दिल ।

अः शिक्षाता सेवा स्वयो व्यापार व उद्योगकाथं कायो चवपिसं भिलिमिली विज्ञापन याडः वगु शिक्षाखय अरबौ लाय् छ्यलः दायँ करोडौं कमेयाडः वयो चवपिसं याडः भीथाय् शिक्षा तस्कं थिकय् जुयो चवंगु नपां कलेजं विदेशय् छवय्ता घवासा बियो चवंगुलिं थुइकनं मथुइकनं दायँ १ लाख स्वयो अपः बवनामिपुं बवनय्ता विदेशवानिगु अमिपाखं १ खर्ब स्वयो अपः धेबा पिनय् वाडः चवंगु दः धायो दिल ।

मेपिनिगु खाँया ल्यू ल्यू जुयो मापदण्ड हे पू मवांगु कलेजय् ब्वे वान धःसा लिपा समस्या वय फःगु लि सचेत याडः दिसे वयकलं न्ह्यागु विषय बवःसां बिचः याडः जक बवनय् मःगु सुभावा बियो दिसे २०५६ सालय् खवप मा.वि. चाय्कागु इलय् उब्लेया प्रशासकपिसं नगरपालिकाता बवनयकुथि व कलेजत चाय्के बियगु व्यवस्था मरु धःसां ता ई बिकः भीसं स्वीकृति कायागु खाँ व्याकसे अः वहे शैक्षिक संस्थात देया बवस्यलागु व चवजःगु

सच्छि व डय्च्यागूगु स्वप पौ, ब.छि पौ(पाक्षिक)

शैक्षिक संस्था जूगु दः धायो दिसे गुगु संरचना दुनयँ बवन धःसा छुं काथंया समस्या वसां अः पुक बवनय्गु मौका बियः गवाहली याय् धायो दिल ।

नेमकिपाया केन्द्रीय दुजः नपां बागमती प्रदेशया सभासद सुरेन्द्रराज गोसाईं जुं बवनामिपिसं थःगु क्षमता, परिवारया स्थिति व परिवेश स्वयो उच्चशिक्षा बवनय्गु स्वयमः धायोदिसे ल्यासे ल्याम्होया इलय अपलं मौकाया लुखा चाइगुलिं बांलागु मौका ल्ययो विवेक छ्यलः जीवन न्ह्याकय् फय्के मःगु खाँ नपां वयकलं अपलं मनूत नपां घुलमिल जुय फय्के मःगु नपां अपलं जीवनोपयोगी शिक्षा सय्के मः धायो दिसे - अः या लागिं बांलापुं शिक्षकत मदय्क मगागु खाँ कुलः दिसे बवनामिपिन्ता छम्हा बांलाम्हा शिक्षक जुयगु तातुडः हज्याय् मःगु खाँ व्याकदिल । खवप नगरपालिकाया उपप्रमुख नपां कलेज सञ्चालक समितिया उपाध्यक्ष रजनी जोशी खवप देता ज्ञान विज्ञानया केन्द्र याय्ता खवप नगरपालिकां ज्या याडः वगु नपां नेमकिपाया निर्वाचन घोषणापत्र काथं खवप नगरपालिकाया जनप्रतिनिधिपिसं ज्या याडः वगु खाँ काडः दिल ।

खवप कलेजया प्राचार्य प्रकाश कुमार श्रेष्ठ, खवप कलेज अफ इन्जिनियरिङया प्राचार्य ई. सुजन माक, खवप कलेज अफ इन्जिनियरिङ कलेजया प्राचार्य ई. सुनिल दुवाल खवप अस्पतालया निमित्त निर्देशक मजेश प्रताप मल्ल, खवप कलेज अफ ल या प्राचार्य अनिता जधारी पिसं उच्च शिक्षाया थी थी विषयलय् लाँपु क्यडः दिल ।

खवप मा. वि. या प्राचार्य लक्ष्मीप्रसाद कर्माचार्य लसकुस याडः द्यूगु उगु ज्या इवः सं बवनामिपिनिपाखं खवप मा.वि. बड्डा बलयया अनुभवत काडः दिल । ज्या इवः सं बवनामिपिसं सांस्कृतिक ज्या इवः नं पिब्वगु खः ।



पर्यटन लागा बांलाकयूता सरकारं नीतिगत पला छियमः

जेठ १२ गते

खप नगरपालिकाया प्रमुख सुनिल प्रजापति जुं नेपालय पर्यटन विकास याय् फैगु थाय् यक्व दःसां नं प्रगति याय मफगुली चिन्ता प्वंकसे देया पर्यटन प्रवर्द्धन व विकासया लागिं सञ्चार माध्यमया नं तःहांगु लाहा दैगुलि पर्यटकपुं भीथाय दुकायूता अपलं बयबययाडः प्रचार याय् मः धाय्गु खाँ 'भक्तपुर पर्यटन प्रवर्द्धनया खाँ पर्यटन व्यवसायीपुं नपां यागु छलफल' ज्या इवः सं धायो द्यगु खः ।



वयकलं पर्यटन व्यवसाय चव्ह्याकः यंकय्गुलि सरकारया तःहांगु लाहा दैगु खाँ व्याकसे पर्यटन लागा बांलाकयूता सरकारं नीतिगत पला छियम धायो दिसे खपया विकास नपां हलिमय देया म्हासिइका पिब्वयगु कृतः खप नगरपालिकां याडः वगु दःधायोदिल । नपां वयकलं विदेशी तय्के ध्याछ धेबा हे मकः सिं सम्पदा ल्यंकः म्वाक भिंकः तयो तःगु गौरवया खाँ खः धायोदिसे खपया पर्यटन विकास देशता हे बांलाइगु खाँ नं काडः दिल ।

खप नगरपालिकां पर्यटक सेवाशुल्क पाखं नगरय् माथांवांक विकास यायूता खर्च याडः वयागु अलय् नगरपालिकां याडः वगुसम्पदा ल्यंकः, म्वाक, भिंकः तयगु ज्याखं देशं दुनय् व पिनयया पर्यटकपिन्ता सालः कायूता बांलागु ज्या याडः चवंगु खाँ नं प्रमुख प्रजापति जुं काडः दिल ।

ज्या इवः सं खप नगरपालिका वातावरण समितिया कजि रविन्द्र ज्याखं खप दे, देया दकलय चिच्याक्वगु नगर जूसां ऐतिहासिक व सांस्कृतिक ल्याखं तस्कं महत्वं जःगु नगर जूगु अलय् खप नगरपालिकां सम्पदा ल्यंकः, म्वाकः व भिंकः तयो न्हूगु पुस्ताता लः ल्हाय्गु काथं ज्या साडः चवंगु खाँ काडः दिल ।

विदेशी पर्यटकपिनिगु भरय् जक चवडः चवंसा छुं नं इलय् सड्कट वय फःगुलि पर्यटन व्यवसायीपुं सचेत जुय मःगु खाँ व्याकसे वयकलं खप नगरपालिकां थानाया छगू छगू सांस्कृतिक ज्या इवः नपां जनताया आर्थिक स्तर चवजायकेगुलि नं कृतः याडः चवंगु खाँ काडः दिल ।

खप नगरपालिका पर्यटक सूचना केन्द्रया प्रमुख गौतम प्रसाद लासिवां खप नगरपालिकां याडःचवंगु ज्याया खाँ व्याकसे

पर्यटकपिनिपाखं कायो वयो चवंगु सेवा शुल्कं खपया ऐतिहासिक शैक्षिक पूर्वाधार निर्माण, स्वास्थ्य, लाहातय ज्या दैगु तालिम व पर्यटन विकासया लागिं थी थी ज्या इवः त हछ्याडः चवंगु खाँ व्याकः दिल ।

ज्या इवः सं स्वापु दःपुं पर्यटन व्यवसायीपिसं नेपः या ल्यासे ल्याम्होपिनिगु जनशक्तिता खपया पर्यटन प्रवर्द्धनय् छ्यलय् मःगु, सामाजिक सञ्जालपाखं खपया प्रचार-प्रसार यायमःगु, भीगु थःगु नसा ज्वलं छ्यय्के मःगु, पर्यटकपिन्ता जिवय् निंगु नसा खः धाय्के फय्के मःगु, खपया भीगु हे वस्तुत उपहार काथं छ्यलय् मःगु, पर्यटकपिन्ता सुरक्षा, गल्ली खिचा नियन्त्रण, ई काथंया नीति हयमःगु बहनीया पर्यटकपिन्ता बांलागु व्यवस्था बांलागु शौचालयत, सांस्कृतिक ज्या इवः त क्यडः तय मःगु थजगु बिचः प्याहाँ वगु खः ।

ज्या इवः सं दुरिस्ट गाइड एसोसियसन अफ नेपाल, रेष्टुरेन्ट तथा बार एसोसियसन नेपाल, नेपाल एसोसियसन अफ ज्याफिटिङ्ग एजेन्सी होटल एशोसियसन अफ नेपाल, नेपाल टुरिज्म डेभलपमेन्ट इन्टरप्रेनर एशोसियसन, नेपाल पर्यटन तथा होटल व्यवस्थापन प्रतिष्ठान, पर्यटक प्रहरी केन्द्रीय कार्यालय, नेपाल एसोसियसन अफ टुर एण्ड ट्राभल एजेन्ट, भक्तपुर पर्यटन विकास समितिया नायो भाजु नपां प्रतिनिधिपुं भःगु खः ।

तालिम निरीक्षण

जेठ १२ गते



खप नगरपालिकाया प्रमुख सुनिल प्रजापति जुं गरिबी निवारणया लागिं लघु उद्यम विकास ज्या इवःपाखयया खप नगरपालिकाया ग्वसालय् न्ह्याकगु आधारभूत छँगुया ब्याग/भोला, मखमली लाकां बेकरी दय्केगु तालिम स्वयोदिसे वयकलं प्रशिक्षार्थीपिन्ता सयकागु ज्ञान व सीपता व्यवहारिक व व्यवसायिक रुपं छ्यलयूता घ्वासा बियो दिल । सय्क चवपिसं तालिम थः पिन्ता बांलागु खाँ काडः दिल ।

शी थी सम्पदा दाडः च्वंगु स्वः माय्गु इवल्य थन्थु दरवारय नेमकिपाया
नायोभाजु नारायण मान बिजुक्छै (२०८२ जेठ १२ गते)



लाहातय ज्या दैगु तालिमत बियो च्वंथाय स्वः मायोदिसे नगर प्रमुख
२०८२ जेठ १२ गते)





ख्वोप कलेजय 'इन्भार्मेन्टल सोसियल एण्ड गभर्मेन्स
इनोभेसन' या प्यकगु राष्ट्रिय सम्मेलन

जेठ ८ गते



ख्वोप नगरपालिकाय जनप्रतिनिधिपुं शहली जूगु बषदा फुत

जेठ ६ गते